

1:1 Hyak men youbuka, nidya' uyiwanggom bok, yub ara seleb ulumok. Yub ara, Imik Neyung ablaboka ulureekanya, yub ara Imik Neyung ulumok. **2** Hyak men youma' enyek ab moruwoka, yub ara Imik Neyung ablaboka ulurek. **3** Yoka'-yoka' nidya' ara al adya uyimok. Yoknya nedya, hnonok sibir anaba uyiwanggomok. **4** Al lomok ara embeng una' damok ulumlakanya, ban embeng una' ara nim ek dilina' yebellilisil. **5** Ban dilina' adya guna' ak sam yeblamlakanya, guna' adya dilina' ak sikleldinggulomla. **6** Nimi ben hnon alja si nera Yohanes, Imik Neyung adya wa weblula' aboka bokol yeilimok. **7** Al pik uboka nimi nidya' dib senewanoka' aboka, ban dilina' enyek, geklewoka neksununa' aboka yeilimok. **8** Al nong ak dara, ban dilina' nong unggulumok jok, ban dilina' enyek, anya aboka neksunun aboka yeilimok. **9** Ban dilina' ara dib nongnya ulumookanya, yeindeboka, nimi nidya' ak sokok an yebellilisil. **10** Alda sokok an ulumookanya, soko ara aladya uyimok bok, soko nim edya dara, alak elgom ulumek. **11** Aljinya nek yeilimok bok, alja meneng mok nim edya dara, alak peroba' leboka dobnenggumek. **12** Bok, alak dib domek nanga nidya' ara, alja si nek dib senemek nim era, Imik Neyung mabo dangalamak migiba elegosuk. **13** Dara, nimi lunuwoka beillilisaka' adya gom, soko nang ganya seinina' adya gom, nimi unuwanamna senelamla adya gom, Imik Neyung adya ok Imik Neyung mabo nenesuk. **14** Yub ara soko nimi nong dangamookanya, wana' uboka eleksina' hnon, dib yub hnon, alak deknewoka, nun gangganek ulumok. Dara, alak imik nenemok nong senedya' migib era, Imik Neyung alja hnonok me ulumoka' adya nong senedya' eiylimouba. **15** Yohanes bedya alsamba geklewoka nekesuk. Hnon wenyaro lelemoka' ara, "Nak dara eimik, alda orowek men ulumoka' anasa, al eimik yanalanya bera, alak dara senenggomnya, nak dara meknya, wenyamsa' ara, ban benyek lemsa," hyok. **16** Dara, alja deknewoka ulumla' ak ab, nunda nidya' domouba. Alja wana' uboka eleksina' elegend sounulusilekanya, soba' dolmorulumab. **17** Imik Neyung adya unuwanalum an yub ara Musa bedya elegesuk bok, wana' uboka eleksina' hnon, dib yub damoka hnon dara, Yesus Kristus adya bo yeilisuk. **18** Nimi hnonok adya, Imik Neyung bek heng eilina' sibir anaba orok bok,

Imik Neyung alja me hnonok ara, alja neyung beb neika' lelewoka uluraakanya, nadya neyung bera ban anaso ulumla aboka nuk amasuk. **19** Yerusalem heikik ulumek Yahudi nang edya, yuba gak nang ab, Lewi nang ab, anda heknya do aboka Yohanes bek heil bululum aboka orugomek dara, Yohanes bedya ban wenyaboka laga lebok, **20** "Nara Kristus nimi blebsina' dubnya unggulumna," hyok. Alda gununa' loboka, laga poboka lebok. **21** Dara, alak heimek, "Ban wenyalam dara, heknya ululam do? Anda Elia de?" aboka heibek bok, "Nara Elia benya' goma'," hyok. Dara, anda eimik yanamla alanjaknya ununumna' lenya bera anda an de?" hyek. Bok, "Orok," hyok. **22** Dara ono' "Dara, anda heknya ululam do? Orugosak nang ak ban wenyamla henemaba' anasa, nara benya' aboka neksilom. An dam nang ak heka' aldalalam do? aboka heibek. **23** Alda wenhyok, "Ununumna' lelemoknya Yesaya wenyamok sok lebsin, Nara gasak sokok ulumnakanya, Wenelesilnya alja pik jong peiyiwolulum aboka lelenanya ulumna," hyok. **24** Heil bululum aboka orugosik nang danera, Parisi nang ulumek. **25** Dara, sikda Yohanes bek, "Anda Kristus unggululam, Elia unggululam, eimik yanamla alamek ununumna' lenya unggululam jok dara, hekasa meka dalasilim do?" aboka heibek. **26** Alda wenhyok, "Nara mek dem adya ok dalasin bok, ugun gangganek sam ara, ugumba elgom ululumnya ben hnon ulumla. **27** Alda eimik nak yanalanya bera, alda senenggomnya bek anasa, nara meksonya bedya dara, alja yan ongonan' henga loboka gwiriwanggunusinya," hyok. **28** Ban nidya' unulumoknya nera, Yordan meka gobuka eer sam Betania heikek Yohanes bedya meka dalasuka' ak ab ulumok. **29** Ampum ara, Yohanes bedya Yesus ara alak yalamoka' eiyimok dara, "Soko nimi malya una' doboka boboganesilnya Imik Neyung domba pam ara kendululum. **30** Nak eimik yanalanya ara, alda men ulumok anasa, alda senenggomnya amsa' ara, ban benyek lemsa. **31** Nababya alak men ella unggulusebok, alda Israeli nim eibnoka' aboka meka dabgiga yeilimsa," hyok. **32** Dara, Yohanes bedya ban laga leboka' ara, "Geisinya ara yalma wining anaso' imik ab yingginiboka alak bul yeilimoka' eiyimsa. **33** Alak ella ubnenggusinya bok, mek adya dalalom aboka orugonyoknya bera nak wenyanyok, Geisinya yingginiboka bul yalya' eibnelamnya bera, wera alja ugunuk Geisinya adya

mek diba' dalamnesilnya bera alan, henyok. **34** Dara, ban eiyimsakanya, ban benera, Imik Neyung alja me ulumla' ara alan aboka laga lelesin," hyok. **35** Ampum ara, ono' anyagan Yohanes beb, alak diriga balareka' penya nang eb, neika' ulumek. **36** Dara, Yesus ara ono sam yabalamoka' eiyimok dara, alda wenhyok, "Kendururum, Imik Neyung alja domba pam ara alan," hyok. **37** Alak diriga balarek nang penya alja leboka' kerek dara, sikda Yesus bek diriga balarek. **38** Yesus al kemel samalamookanya, al weilik sam yalareka' eibuk dara, wenyhusuk, "Ugunda heka' aboka do?" hyok. "Rabi o, anda har sam malam do?" arek. (Rabi ara nunja yub era, neklesilimnya aboka lerek). **39** Alda wenyasuk, "Or yorurum. Eibnerum," hyok. Dara, sikda ono' yalareekanya, al ulumoka' eiyireekanya, ban sum neikik ulumek. Sinik jam empat so ulumok. **40** Ban kereekanya, Yesus bek diriga bilirek nang penya ak dara, ben hnon Simon Petrus alja weis Andreas be ulumok. **41** Alda men unumoka' ara, alja dong Simon be eboka alak wenhyok, "Nunda Mesias seleb eiyimab," hyok. (Kristus anasa lebok). **42** Dara, Simon benyek Yesus bek bo yeilimok dara, Yesus adya Simon bek henga keemookanya wenhyok, "Anda Yohanes bedya me Simon ululam. Wera Kefas aboka si silimnenjak," hyok. (Kefas si ara, Petrus andanasa lelemak). **43** Nenyek sum ara, Yesus ara Galilea sokok binimna senemok. Dara, Pilipus bek eibuk dara, "Anda nak diriga yananelem," hyok. **44** Pilipus bera, Andreas beb Simon beb, sikda neik Betsaida heik nang ulumek. **45** Pilipus bedya Natanael be eiyiboka alak, "Musa bedya unuwanalum an yub sam alak weboknya bera, ununumna' lelemek nang alak wemeknya bera, eiyimab. Nazaret heik nang Yusuf bedya me Yesus alak eiyimab," hyok. **46** Natanael wenhyoka' ara, "Nazaret alam de? Peroba' ara, Nazaret heik ab lanawanamso de?" hyok. Wenyek Pilipus bedya, "Kemel yalom," hyok. **47** Yesus adya Natanael oka yoka' eibuk dara, wenhyok, "Israeli nang yoka' ara alan. Sonda' ara al lomok hyak unggulumla," hyok. **48** Natanael bedya, "Anda hekadya nak ella ulunelem do?" hyok. Wenyek Yesus adya, "Pilipus bedya youbnenggubmagel bok, anda ara gal damak ulmalama wenyek eiyingen," hyok. **49** Dara, Natanael bedya, "Rabi o, anda Imik Neyung me ululam, anda Israeli nang edya senenggom dubnya ululam," hyok. **50**

Yesus alak, "Ara gal damak ulmalama eibgenekanya lebgena' adya, dib senelam de? Anda hyak senenggom so una' eillilemmelam," hyok. **51** Ono' Yesus alak, "Ugunuk dib lebsin, ugunda nidya' ara im pik bakoka, Imik Neyung lero nang adya nimi diba' me ak wele golugoka ulumnamaka' eibnelum," hyok.

2:1 Liga penya seleb yenemok dara, Galilea sokok Kanaan heikek ara, gela dobdangoka masa youmek dara, Yesus eiling geneba ono' neika' unumeka' ak ulumok. **2** Dara, Yesus ab, alja diriga ban nang ab, gel saboka' youmekaka' ak del yanalum aboka sikbabya youbosik. **3** Wera delemekanya, anggur meka seleb dengamok dara, Yesus eiling gedya Yesus ak, "Anggur mek ara seleb dengamla," hyok. **4** Dara, Yesus adya alja' genong gek, "Genong o, hekasa nak ban lelenelem do? Nak laga nenewanenel salek era, anam ulumla bar," hyok. **5** Yesus eiling gera ek wa nim ek, "Alja heka' ak oruganesil ara, ugunja ganya doboka unululum," hyok. **6** Dara, anyagan ara, sik Yahudi nang uguma' mek elekna' amba, girik mek hmeiya hnabbadya ulumok. Ban mek hmeiya hnonok dara, gouba denga hnonok danyek or deknewaneseng. **7** Dara, Yesus adya ek wa nim ek, "Ban mek hmei enera, mek sirika' ok dekneb lobulum,"hyok. Dara, sikja nidya' mek hmeiya gweboka hyak deknemek. **8** Wera ono', Yesus adya ek wa nim ek, "Wenera mek enyek, meka' gweb bobmunukanya, masa youmaka' dubnya bek meka' debyamadulula' aboka bo bululum," wenyhusuk dara, gweboka alak bo byik. **9** Dara, masa youmekaka' dubnya bera, ban mek sirika' bok anggur mek dangamoka' ak debyamamok. Alda ban mek enera hanyagarab sam senewoka elgom ubok bok, alja ek wa nimi ban mek gweboka yekemek nim ok ella ubek. Dara, ban masa youmek dubnya bera, gela domoknya bek, "Yalom," hyok. **10** Dara, gela domoknya bek, "Nimi gela domna' nidya' ara, gela donanya bedya dara, pero-pero meemna anggur mek enyek men beibnekanya, nimi yeilimna nimi nauba den dara, wera mek so memenanya nera, eimik beil yalamak. Bok, anak dara, perob anggur era beiblolama' ara, wenyok ok seleb ono' beiblam," hyok. **11** Yesus adya, alja senenggom migiba' bekna' sokok unura yabalamoka' hyak men youbuka unumoknya nera, Kanaan

heikek ab unumok. Ban unumoka' adya, alja senenggom migiba' una' era laga dangamok. Dara, alja diriga ban nang era, alak dib senemek. **12** Ban seleb unubgogomok dara, Yesus ab, alja genong geb, al kabo nang ab, alja diriga ban nang eb, Kapernaum heikek bilimeekanya, liga wen ono sam ulumek. **13** Yahudi nang sikja perob sum oka dangamok dara, Yesus ara Yerusalem heikek bilimok. **14** Yesus ara Yerusalem heikek seleb byuk dara, hnon nim era, Imik Neyung eremek sam domba pam ab, sapi pam ab, yalma wining eb, deklemeke dara, yok nimi hnon sikja yangana' gal ak bukoka, rupiah amoma' ubdangdo balameka' ak eiyisuk. **15** Ban unulumeka' eiyimookanya, Yesus adya henga doboka legebna' meewoka, domba pam ab, sapi pam ab, yoka'-yoka' nidya' deklemeke' ara, e weilik ab hyak nidya' doluwoka yaksuk. Dara, rupiah amoma' ubdangdo unulumek nang era, sikja rupiah nidya' dolub menegoka, yangana' gala yaawoka sen-senem ab menegemok. **16** Dara, Yesus adya yalma wining deklemeke nim ek wenyhusuk, "Ugunda ban doboka bo bululum. Ugunda nadya' neyung bedya e nera, salya' dekna e nenenggom mem," hyok. **17** Dara, Yesus ak diriga ban nang era, yuba Imik Neyung bukuk momnya doboka' ak seinimek. "Anja e nek wana' kwelemna' amba nak uka lolok ganagananel," amoka' ak seinimek. **18** Yesus adya ban unusuka' seleb dara, Yahudi dub nang era Yesus ak , "Wera or anja nuk heka' hubmen anyek eibnoba' aboka, anasa ulumna aboka hyak yok so bekna' diba' enyek unuwalom," hyek. **19** Dara, Yesus adya sikenek, "Wera ugunda ban e nera goluwoka sokok beiblulum. Dara, nadya liga winilyok saaboka sobnamna bar," hyok. **20** Dara, sikda alak, "Gibna' denga penya sorob Imik Neyung e nenyek babya, anja liga winilya sobnamna helema' de?" hyek. **21** Bok, ban wenyamoknya nera, Yesus al nong anasa sene bobnenewoka lebdangamok. **22** Dara, Yesus suboka sekok dara, alja diriga ban nang era, wenyamoka' orowek kemek bok adya, anyek lebok aboka bekemek. Dara ono', alja diriga ban nang era, Imik Neyung yuba momnya doboka' hnon, Yesus adya sikenek wenyamoka' hnon, seiniwoka dib senemek. **23** Yahudi nim perob sum meemek sum enyek, Yesus ara Yerusalem heikek ulumookanya, nimi nauba al adya yoka'-yoka' nidya' lok so unulumoka' eiyimeekanya, anasemba leboka alak dib senemek. **24** Bok, Yesus ara nimi nidya' ganya

ella ulusilnya bek anasa, sikenek dib senewanggumok. **25** Yesus ak dara, alda hyak nimi ganya ak orowek ella ulusilnya bek anasa, nim adya bera ban anaso ulumla aboka, nak neknenok senewanggumok.

3:1 Nimi Parisi nanga ben hnon alja si Nikodemus bera, Yahudi nang emba Imik Neyung yuba lena' dubnya ulumookanya, **2** inimnek enyek, Yesus ak sam yeiniboka, "Neyung neklesilimnya o, anja yoka'-yoka' migib unululama' anyek, Imik Neyung adya anak aragena' orok dara, wera unuwanggunusoma' anasa, anak dara Imik Neyung adya aldib sokok sam neksinya bokol yeilinjoknya bek ululama' ara, nunda ella ulumab," hyok. **3** Dara, Yesus adya Nikodemus bek, "Nara anak dib lebgen, Nimi ben hnon penya beilina' anam orok dara, alda Imik Neyung wenesin heikek sam ara meka' eibnenggunumla," hyok. **4** Dara, Nikodemus bedya Yesus ak, "Seleb nauba dangosonya benyek saaboka alja genong gedya mon lomok wekoka beibneseng de? Seleb nauba nesobok dara, unuwanggunuseng," hyok. **5** Dara ono' Yesus adya, "Nara hyak dib lebgen, nimi be hnon alda mek adya hnon, Geisinya adya hnon, beilina' orok dara, alda Imik Neyung bedya wenesin heikek weknenggunumla. **6** Nimi nong ak dara, nim adya beillilimak bok, ganya ak dara, Imik Neyung Geisinya adya beillilisol. **7** Nadya ugunuk saaboka beibnesil wenyalasina' ara, anda loka dabnenggunungeso. **8** Kabo' ara alja dorogunun senemna' ak ara nidya' doroklamla. Dara, alja uu alamla' ara kelelam bok, hanyagar ab sam yalamla, hekmok balamla' ara, anda elgom ululam sok, Imik Neyung Geisinya adya beillilisol nim ek dara, al anaso ulusil," hyok. **9** Dara, Nikodemus bedya Yesus ak, "Ban ara heka' anasonya ubnamso do?" aboka heibuk. **10** Yesus adya alak, "Anda Israeli nim emba yuba neksinya ululam bok, nera elgom ululam de? **11** Nara anak hyak dib lebgen, Nunja seleb ella unanya nenyek ugunuk neklesab hnon, nunda seleb heng eiyyinanya nenyek ugunuk laga lelesab bok, ugunda nunja yuba dib senewoka donggululum. **12** Sokok sam an ululanya nenyek neksina' anaba dib senenggululuma' anasa, nenera imik heikek sam ululanya nenyek neknesisinya dara, heka' huboka dib senewanesom do?" hyok. **13** "Nimi hnonok sabin anaba imik heik sam embenga' welewanggubuk bok, nimi

diba' me nek imik heik ab yeilimoknya bek hnonok unumok. **14-15** Musa bedya, hwalek gasa' ak sam, mesa baga' gal ak kweb weininggemok sok, nimi hnonok-hnonok nidya' alak dib senewanamak nim era, embenga' una' diba' dobnoka' aboka, nimi diba' me nenebabya neik so gal ak glab weiningganamak," hyok. **16** "Al Imik Neyung adya nimi soko nim ek, hyak wana' ulusuukanya, alja me hyak hnonok bok, nimi soko nim amba bokol yeilisuk. Nimi nidya' hnonok-hnonok alak dib senewoka dobnamak dara, somoganggunumak bok, embenga' una' diba' dorowanamak aboka, alja me bokol yeilisuk. **17** Imik Neyung alja yando me sokok sam bokol yeilimoka' ara, anyagan yana lelelesulula' aboka bokol yanggumok bok, alda alja me nedya soko nim ek blebsulula' aboka bokol yeilimok. **18** Alak dib senewoka dolomak nim era, Imik Neyung adya eimik yana lelewoka igina boyiwanggunesil. Bok, alak dib senenggulumak nim era, wera, Imik Neyung alja hnonok me nedya si nek dib senenggulumaka' anasa, seleb igina dobnemaka' lomok ulumak," hyok. **19** "Imik Neyung adya yana kilisila' damok ara ban: Dilina' ara sokok an seleb yok bok, nim ara sikja unulumaka' anyek malya nong anasa, guna' ak sam anyek perob so senelemak. **20** Nimi be hnon malya ululanya bera, dilina' ak lek senelamlakanya, alja unulamla anyek laga danalyek aboka, dilina' ak sam yangganggulumla. **21** Bok, heknedya dib nong ok pe unululanya bera, alja unulamla' ara, Imik Neyung senelamla sok unulamla' anyek, laga dolula' aboka dilina' ak yalamla," hyok. **22** Ban nen seleb dara, Yesus ara alja diriga ban nang eb, Yudea sokok bilimek. Dara, sikeneblaboka minggu penya so ulumeekanya, nimi hnon meka dalasuk. **23-24** Dara, Yohanes beneba alak anam henga gregoka gasa ek beibnenggumek salek enyek, Salim ok berem Aion heik sam ulumookanya, meka nauba ulumoka' anasa, nimi hnon meka dalasuk. Nim ara meka dabsulula' aboka soba' banyagan yalamek dara, meka dalasuk. **25** Ban sum enyek, Yohanes Pembaptis bedya diriga ban nang eb, be hnon Yahudi nang eb, nimiguma' mek elekna' damba lololdalamek. **26** Dara, hnon nang ara Yohanes Pembaptis ak biniboka, "Neyung neklesilimnya o, anab neika' Yordan mek inik ulurumukanya, nuk amasulumnya bera, wera albabya nimi meka dalasilikanya, nimi nauba alak mamagal balamak," hyek. **27** Wera

Yohanes Pembaptis bedya dara, "Nim ara Imik Neyung adya sikenek eleganggunususo dara, yoka'-yoka' dobnenggunuseng. **28** Nara nimi blebsina'anya goma', alda pika mengelelul aboka bokol yeilinyoknya nok ulumna, ugunuk seleb wenyamsa' anyek, damoka kelum nim ululum. **29** Dobnamna gel gera, dobnenanya bek aljinya ulumla. Dobnenanya alja' hem bera, sikda dobdanaraakanya, doblanya bedya yuba hnon kelemla dara, eiya dablamlamla. Anasanya neikik, wera nababya hyak nauba eiya dablanel. **30** Alak dara, hyak nauba danggiga balammelabok, nak dara mek danggiga balammenel," hyok. **31** "Imik heik ab yeilinyanya bera, yoka'-yoka' nidya' amba dubnya ulumla. Sokok ab yeilinyanya bera, nera alda sokok yoka'anya anasa, alda sokok sam ululanya nyek seiniro lelelabok, imik ab yeilinyanya bera, hyak imik dubnya ulumla. **32** Alda seleb heng eiyimoknya hnon, o kemoknya hnon, nyek laga neklesil bok, nimi nidya' ara alja lelemla yuba pe keboka donggulumak. **33** Bok, alja lelemla yuba dib dololanya bedya dara, alda dolomla' adya, Imik Neyung ara alda dib nongnya ulumla aboka laga amalamlamla," hyok. **34** "Dara, Imik Neyung adya bokol yeilimoknya bedya, Imik Neyung bedya lelemla yub nyek lelemla. Alak ara Imik Neyung Geisinya elegelmorulamlamla. **35** Imik Neyung adya alja me nek nauba wana' uboka, yoka'-yoka' nidya' ara, al adya salawolula' aboka elemok. **36** Heknedya Imik Neyung bedya me nek dib senewalenyanya bera, dib ulmoubna' ganya seleb dolomla, bok heknedya alja me nek bleklelanya bera, dib ulmoubna' ganya hyak dobnenggunumlakanya, Imik Neyung adya yu ganya ara al nong ak sob-soba' ulumnamlamla," hyok.

4:1 Yahudi nang edya Yohanes Pembaptis bera mek so meka dalasil bok, Yesus ak dara, nauba meka daboka nimi doru dililamlamla an yuba kemek. **2** Ban wenyameknya nera, Yesus adya ununa' orok bok, alja diriga ban nang edya meka dalasik. **3** Ban yuba en kemok dara, Yesus ara Yudea sokok ab loboka Galilea sokok yeilimok. **4** Yesus balamok pik era Samaria soko hnomunga garal bilimok. **5** Pika balamookanya, Yesus ara Samaria sokok heik si Sikar heikek bilimok. Ban heik ara, Yakub bedya alja me Yusuf bek elegemok soko berem ulumok. **6** Ban sokok sam ara, Yakub

bedya oulyang aboka si simeka' den mek ulumok. Yesus alda balamookanya, hmeng umoka' anasa, ban mek dena' oulyang berem bul bilimok. Heng ara yubyek dukdukanek salek bul bilimok. **7-8** Alja diriga ban nang era heikek dena' dekel bilimek. Dara, Samaria gel gera meka gwel yeilimok dara, Yesus adya wenhyok, "Wei, genong o, mek ok anasa, meka gweb eleganenelem," aboka molowok. **9** Dara, ban gel genedya, "Anda Yahudi nang bok, na Samaria gel gek hekasa meka dunun aboka molonelem do?" hyok. Yahudi nim eb, Samaria nim eb, neika' olokdangoka unggulumek nim ek anasa lemok. **10** Gela ara ban wenhyok dara, Yesus adya alak, "Anda Imik Neyung adya eleklesila' ab, heknedya anak meka mololenggela' ab, ella ulusom dara, anja alak molowanasom dara, alja dib embenga' una' mek era eleganenggeso," hyok. **11** Dara, gel genedya Yesus ak, "Neyung o, anda mek gwena' orok, mek oulyang ara hyak lom nong ok onu anasa, heka' huboka dib embenga' una' mek ara gwebnelam do?". **12** Nunja neyung Yakub bedya, ban mek dena' oulyang enera nuk elegosuk. Yakub beneba alba anyagan meka delemookanya, alja mab eb, alja pama beillilimoka' nidya' ara, al anyagan delemek. Bok, anda Yakub bek sokok nenewanalamakanya, anak dubnya danalam de?" hyok. **13** Yesus adya alak, "Ban mek demeija nim era, eimik ono' saaboka mek ok ubnesil bok, **14** nadya elegeisinya mek enyek delenya bera, eimik saaboka mek ok ubnenggunumla. Bok saaboka, nadya elegeisinya mek ek dara, alja nong lomok sam ara sob-soba' yabalmorulamla mek anaso dangoka, dib embenga' ulmoubna' eleganamla," hyok. **15** Dara, ono' ban gel genedya, "Wei, neyung o, ono' mek ok ubnelyakanya saaboka anyagan mek soba' gwel yanyek aboka, wera ban mek enyek eleganenelem," hyok. **16** Yesus adya alak, "Anja nanya youbol bimenekanya, ono' anyagan yanarum," hyok. **17** Dara, ban gel genedya, "Nara nanya orok," hyok. Dara Yesus adya, "Anda hyak dib nong leblam. **18** Seleb liga lambadya nanya dolum bok, wen anablaboka ulurumnya bera, wera anja nanya unggulumla' anasa dib leblam," hyok. **19** Yesus adya ban wenyamoka' eiyimookanya, ban gel genedya alak, "Neyung o, anda hyak dib nong ununumna' lena'anya ululama' eiyinggen," hyok. **20** "Nunja neyung yab era, Imik Neyung bek ban mein enyek an giblemek bok, ugunda Yahudi nim

era, Yerusalem heikek ok Imik Neyung gibnemab alalum," hyok. **21** Yesus adya alak, "Yok yanamla sum enyek, nim adya Imik Neyung ak ara, mein enyekan goma', Yerusalem heikek ok goma', giblemnemak ara dib senewalom. **22** Ugunda Samaria nim era, ugumba ella unggululumnya nek giblelum. Bok nunda Yahudi nimi numba ella ulumabnya nek, nimi blebsina' damok ara, Yahudi nim ek ab yalamla' anasa, numba ella ulumabnya nek giblemab," hyok. **23** "Bok eimik yanamla sum era, ono' al wen seleb ulumla sum eneba, Imik Neyung bek dib giblemak nim era, ganya adya gibnemak, Imik Neyung alba ulumla sok sunuwoka gibnemak. Ban anaso nimi ganya ara, Imik Neyung adya nak unu gibneneseng senelamla. **24** Imik Neyung ara, ganya ok ulumla' anasa, alak giblemak nim era, ganya lomok, Imik Neyung alba ulumla sok sunuwoka, unu giblemnemak," hyok. **25** Dara, ban gel genedya Yesus ak, "Nimi blebsina' dubnya, Kristus aboka si silimaknya bera, yanamla' ara ella ulumna. Alda yalya dara, yoka'-yoka' nidya' ara nuk neknesil," hyok. **26** Yesus adya, "Wenyhelemnya bera nara alan. Alan anab yuba neika' salanam," hyok. **27** Ban salek enyek, alja diriga ban nang era dena' dekel bilimeka' ara yek. Yesus ara gel ab yuba salareka' eiyimeekanya, sikda loka dasuk. Bok sikja dara, "Genong o, hekak senelelamakanya yeililam do?" aboka heibnenggumek. Ono' Yesus ak anaba, "Hekasa anda gel ab yuba salmorum do?" aboka heibnenggumek. **28** Dara, ban sum enyek ban gel gera mek hmeiya beib loboka, heikek byuukanya lebokja, **29** "Ugunda nak yoka'-yoka' nidya' nadya unulunanya nidya' laga nenelnya benyek kemel yoululum. Alda nimi blebsina' dubnya Kristus ulumla do?" hyok. **30** Dara, nimi nauba sikja heikek ab goboka Yesus ak kemel bilimek. **31** Wene salek enyek, alja diriga ban nang edya, "Neyung o, wera or dena' seleb ulumla' anasa, wera or del yabalom," aboka alak duka' lolom-lolom alamek. **32** Bok alda sikenek, "Ugumba elgom dena' don nak hnon ulumla' anya'," hyok. **33** Dara, alja diriga ban nang era, sik moumen heibdangdo balamek. "Nimi hnon alsamba dena' bo yeilimak de?" aboka heibdangdo balamek. **34** Dara Yesus sikenek, "Nadya dena' era, nadya' neyung, nak bokol yeilinyoknya bedya, alja senelamla anyek, unululul senelamla' hnon, nak welelula' aboka lenyok wa hnon, senenanya loboka welemna dara,

wera nadya dena' era alan," hyok. **35** Dara Yesus sikenek, "Wala' dombadya mablya dara, gwaneng dena' lanawanamla ara ugunda wenyalalum. Bok, nara ugunuk saaboka lebnesin, wa webloroba' anyek doka daknenyak senewoka eng olomla' anyek, ugunda kendululum. **36** Doka daklamak nang ara, sikja dekna' seleb dolomak. Embenga' ulmoubna' amba dakoka mamaklemak. Dara, eimik era doka doklomak nim eb, doka daklamak nim eb, ei-ei ganya daboka ulumnemak. **37** Be hnon melemla dara, ono' yok nang daklamla, wenyalamak ara, dib nong. **38** Nara ugunja webnenggublum wak sam doka daknelum aboka orugusin. Yok nim edya orowek seleb nauba wemeka' anyek, ugunda dakluma' adya peroba' doblum," hyok. **39** Dara ban gel genedya, "Nadya nidya' ulusanya laga lenel," hyoka' adya nimi nauba Samaria nim era, Yesus ak dib senewoka domek. **40** Dara, Samaria nimi Yesus nong ak okoka eiymek dara, alak yeiniboka nuk pe ulunoba' aboka alak molomek. Anasa, Yesus ara liga penya sikja heikek gobdo mamok. **41** Dara, nimi nauba ara Yesus adya neklesuka' anyek, sikja okoka eiymekanya, alak dib senewoka domek. **42** Dara, Samaria nim edya ban gel genyek an, "Anja nuk wenyasilima' adya ok dib senewanggumab. Wenyok alda nun dam nang okoka heng yoka' bekoka eiymabakanya, alja lelemla yuba kemaba' adya, alak dib senewoka doboka, alda soko nimi bleblesilnya diba' ulusila' ara ella ubab," hyek. **43** Yesus ara Sikar heikek liga penya mamok dara, Galilea sokok bilimok. **44** ("Nimi be hnon ununumna' lena'anya bera, dam heikek nim adya gibnenggulumak," aboka Yesus adya yok men sum enyek wenhyok). **45** Yesus ara Galilea sokok bilimok sum enyek, nimi ganya eiya daboka alak doru diyimek. Sikda Yerusalem heikek Yahudi nang perob sum enyek ulumekanya, Yesus adya yoka'-yoka' unulumoka' anyek eiymeka' anasa, peroba' leboka Galilea yanggok dara, doru diyimek. **46** Dara, Yesus ara Kanaan heikek mek sirika' bok anggur meka nenemok heikek ono' yeilimok. Kapernaum heik ara, soko dubnya bedya me neikna' salamoka' ak malamok. **47** Dara, soko damnya bera Yesus ara Yudea sokok aba' ara, Galilea sokok yeilimla ana' kemok dara, Kapernaum heikek ab nadya somogonuna' ulumla me era hwebnulula' aboka Yesus ak el bilimok. **48** Dara, Yesus ara ban soko dubnya bek, "Ugunda yoka'-yoka' lok so bekna'

senenggoma', lokol dana' eilinggululum dara, dib senenggululum," hyok.

49 Ban soko dubnya bedya Yesus ak, "Neyung, nadya me anam somoganggumlya salek enyek ban men yalom," hyok. **50** Yesus adya alak, "Anja me nera seleb meremla anasa or bilom," hyok. Dara, dubnya bedya Yesus lemoka' dib senewoka lo bilimok. **51** Dara, dib lebnel senewoka pikek balamok salek enyek, alja ek wa nang alak yeiniboka, "Neyung, anja me nera seleb merewo," hyek. **52** Dara, "Alja hwer salek ek me nera merewo do?" aboka heisuk dara, "Yubyek dukdukanek enyek pob ara denghyo," hyek. **53** Dara, ban me nen alja' neyung bedya, Yesus ara al wenyek wenyamo' anasa, nadya me merewo senemok. Dara, ala' mabo gel e gekman Yesus ak dib senewoka domek. **54** Yesus ara Yudea sokok aba' ara, Galilea sokok yeilimok dara, ban senenggom ununa' enyek penenya unumok.

5:1 Wera yok sum era, Yahudi nang perob sum yenemok dara, Yesus ara Yerusalem heikek bilimok. **2** Yerusalem heikek domba pam pik aboka si silimek serekna' berem, Ibrani yub adya, Betesda aboka silimek mek gwan ulumok. Anyagan ara, senenggoma' yangamek ekla lambadya gwaneb ganagamok. **3** Dara ban ekla ak ara, neikna' salalasuk nimi nauba maro balamek. Wera hnonda henga lum ulusuk nimi hnon, hnonda koma bulumek nimi hnon, hnonda nonga yana soruka heilisuk nimi hnon maro balamek. Dara, meka waral yabalya enyek, wene sab-sab hwibnoba' aboka diri malamek. **4** Hnon yok sum yok sum era, Imik Neyung lero adya mek gwan enyegan sekel yinggin dara, meka wareboka lolomok. Dara neikna' salananya bera, mek gwan en warel yaben sab-sab men berra yoruwoka hwibnanya bera, wera alak salamna neikna' era dengalamok. **5** Dara al onok ara, nimi be hnon neikna' salamoka' anasa, malamok salek era gibna' denga hnon goboka ebdobnya goklombadya dangamoknya be hnon malamok. **6** Wera, Yesus adya ben era ekla buna' ak malmoublemoka' ak eiyiboka, alda youma' ek moruwoka salabmoumoka' ella umok dara, Yesus adya benyekan, "Anda mereweisinya senelam de?" aboka heimok. **7** Dara, neikdo malamoknya bedya Yesus ak, "Neyung o, meka warel yaben salek dorong nen dara, nimi hnon anyagan aranggulunyaka' adya, okna

ulunel. Wera ono' meka warel yaben dara, nababya hwibnuna' aboka balanabok, anam ban salek enyek, yok nang ek men hwildolomak," hyok. **8** Dara Yesus adya, "Anda sekoka anja esona' doboka bobmenekanya yabalom," hyok. **9** Wera al wene salek enyek bera merewok. Dara, alda esona' dobok dara, bobookanya yabok. Ban unumoka' ara Sabat mem sum ek umok. **10** Anasa wera, Yahudi nang edya, wenyok meremoknya bek, "Sumen era Sabat mem sum anasa, anda anja esona' doboka bo yabana' ara unuwanalum an yuba mem alamlam," hyek. **11** Bok benedya sikenek ara, "Ousa nak hwenelnya bedya, Anda anja esona' doboka bobmenekanya, yabalom aboka orugenela' anasa umna," hyok. **12** Dara sikja, "Anak esona' doboka bobmenekanya, yabalom aboka orugenggelnya bera heknedya do?" aboka heibek. **13** Bok, Yesus ara seleb nimi hnom dan dengamok bok adya, wera heknedya hwenel do aboka ganya emok. **14** Wera ono' eimik enyek, meremoknya bera Yesus ara Imik Neyung ek sam eibuk dara, Yesus adya benyek, "Wera anda seleb merewalama' anasa, ono' hnon sounuwoka malya unggom mem. Ono' malya ubmen dara, hyak nauba so malya dagelyek bar," hyok. **15** Dara meremoknya bedya, wera Imik Neyung ek ab goboka biniboka Yahudi dub nang ek sam, "Nara Yesus adya hwenel," aboka nekdo bilimok. **16** Anasa leboka, Yahudi nang edya dara, Yesus ara Sabat mem sum bok, nimi hwemoka' anasa, alak obnoba' aboka dub einimek. **17** Bok Yesus adya Yahudi nang ek, "Nadya neyung bedya weneba or wa weldibilloklamla' anasa, wera nababya welemna," hyok. **18** Wera Yesus adya ban wenyaboka lemok yub edya, Yahudi nang era, hyak Yesus ak obnoba' aboka nauba so yeiriwoka dulume. Dara, nera Sabat mem sum bok, nimi bleboka hwelesuk amba ok gom. Ono' alda, Imik Neyung ara nadya neyung aboka lena adya, wera nera Yesus ara, Imik Neyung nonga gebeldalamla senewoka, dulume. **19** Wera an ara Yesus adya Yahudi dub nang ek, "Wera ban lebnesina' ara dib lebnesin, Alja me nedya yoka'-yoka' unulamla' ara, alja migib edya ok ganya doboka wenggulumla. Alja unululanya nera alja' neyung bedya seleb unulamla' anyek eiyiboka unulamla. Anasa wera, neyung bedya unulamla' anyek, alja me neneba neikik unulamla. **20** Anasa, neyung bedya alja me nek wana' ulumlakanya, alja unulamla' nidya' ara, alja me nek amalamlam. Wera ono'

eimik era, neyung bedya hyak senenggom ununa' enyek elegoka aawalya dara, ugunda eiyyiboka hyak loka dabnesil. **21** Anasa wera, neyung beneba somogamna nim embenga' bukiyyiboka sikenek embenga' una' eleklesil sok, alja me neneba neikso, nadya embenga' elegonun senewan nim ek embenga' eleklesil. **22** Neyung bedya alja ok ganya doboka nimi yana lelenggulusil. Bok, nimi yana lelesina' damoka nidya' ara, seleb alja me nek gobdo lemok. **23** Neyung bedya ban unumoknya nera, nim adya neyung bek giblemak sok, ono' alja me nek giblenoka' aboka umok. Wera anasa, heknedy a alja me nek gibnenggulumla dara, wera al bokol yeilimoknya bek gibnenggulumla. **24** Nadya ban lelemna' ara dib lebsin, heknedy nadya lelemna yub ek pe keboka neyung be na bokol yeilinyoknya bek dib senewalya dara, alda seleb embenga' una' ara, alak dib uboka, alda seleb somokna' damok ab ara, embenga' una' ak sam yibilimoka' anasa, eimik alak Imik Neyung adya igina yaka' boyiwanggunusil. **25** Ugunda ban nadya lebsina' anyek dib senewanalum, seleb somogorob nim era, Imik Neyung bedya alja me nedya yuba keboka embenga' bukнемak salek era, eimik yanamla' hnon, weneba seleb yeiniboka ulumla amna ara, ugunda dib senewanalum. **26** Neyung bera nim embenga' una' damok gaknya ulumla sok, ono' al adya alja me nek nim embenga' una' gaknya dangiyimok. **27** Dara, alja me nera nimi diba' me ulumla' anasa, alja neyung bedya alak nimi yana lelesina' ara seleb elegemok. **28** Dara ban lelesin anyek, hyak lok ganya bobnenggulum. Eimik yanamla sum enyek, seleb somogorob nimi nidya' ara Imik Neyung bedya me nedya yuba kebija dara, dicsik oulyang ak ab ara, embenga' suboka bukнемak. **29** Dara, seleb somogorob nim era, sik dicsika' ak ab embenga' suboka bukнемak dara, pe unulumek bok somogorob nim era, embenga' ulunoka' aboka subnemak. Bok, malya ulumeka' ara somogorob nim era, igina dobnoba' aboka subnemak," hyok. **30** "Nara yoka'-yoka' nidya' ara, nadya ok salya' ganya doboka ununggulumna. Nadya' neyung bedya anyek unuwalom alamla' anyek, sunuwoka yana lelelesin. Nabeyok ganya doboka ununggulumna' anasa, wera neyung be na bokol yeilinyoknya bedya unuwolul senelamla anyek unulamna anasa, nadya anyek yana lelewan alamna ara, muna' dib unulamla. **31** Nabeyok ganya doboka, nasamba geklewoka yuba

leldalasanya dara, wera ugunda nak dib senewanggununesom. **32** Bok, ono' ben hnon jok nasamba hnon geklewoka yuba lelemla. Dara, alja lelemla yub era dib lelemla ara, nara ella ulumna. **33** Dara, ugunja seleb Yohanes Pembaptis bek, seleb nimi yuba kel bululum aboka bokol bililum dara, alja dib yuba seleb ugunuk leb elegesuk. **34** Bok, nara ban wenyhenya nera, nara nim adya yuba nasamba geklewoka lelenenok senenggulumna, alda ban wenyhenya' adya ugunuk blebsulula' aboka lelesin. **35** Yohanes Pembaptis bek, alda wesa' yebna' diba' ulumok. Dara alda yeblemok salek era, li hnonok perob senelum. **36** Bok nak geklewoka lelemla yub era, hnon senenggoma' ulumlakanya, Yohanes Pembaptis bera mek so lelenyok. Anasa wera, nadya wen heka' unulamna' ara, neyung be na bokol yeilinyoknya bedya unuwoka welelom aboka orugenyoka' anyek welemna' adya, wera nara aldib Imik Neyung bedya bokol yeilinyoka' anyek geklewoka lelenel. **37** Imik Neyung be na bokol yeilinyoknya beneba, alda nasamba geklewoka yuba lelemla. Bok, ugunda alja yuba kenggululumukanya, ono' alja nong hogung eneba meka' eilinggululum. **38** Ugunda alja bokol yeilimoknya bek dib senenggululuma' adya, alja yub era ugunja ganya lomok sam diba' yina' menggulusil. **39** Ugunja dara, Imik Neyung yuba momnya doboka' einiwoka ulumeibya adya embenga' una' dobnemab senewoka nauba einililum. Wera, ban bukuk sam anaba nasamba geklewoka yuba lelelabok, **40** ugunda embenga' una' dobnob senewoka nak yanggana' lek senelelum. **41** Nara nim adya gigiwanenok senewoka hogunga bo enggulumna. **42** Bok, ugunuk ella ulusin. Ugunda Imik Neyung ak ugunja ganya edya wana' unggululum ara, nara ella ulusin. **43** Nara neyung bedya si pik moruwoka yasa bok, ugunja nak peroba' leboka doru dibninggunulum. Bok, yoknya bera alja si pik yalya dara, peroba' leboka doru dibnelum. **44** Ugunda Imik Neyung be hnonok ok ululanya bedya gigiwousulula' aboka ena' loboka, alda ugunuk nimi yok nim edya nuk gigilesinok senewoka hogunga bo elelum dara, hekadya ugunda dib senewanasom do?. **45** Ugunja dara, nadya neyung bedya saramek sam, aladya malya gebiyiwanesil senen ganya bonenggom mem. Ugunja dibnya senelelumnya Musa bedya malya gebiyiwanesil. **46** Musa bera alda nasamba geklewoka momnya domoka' anasa, ugunda Musa

bedya momnya domok yub ek dib senemun dara, wera nak anaba dib senewananulum. **47** Bok, ugunda Musa bedya momnya dobok yub enebabya dib senenggululuma' anasa, wera heka' adya nadya ugunuk lelesina' ara dib senewanasom do?" hyok.

6:1 Ban unumoka' seleb dara, Yesus ara ono' saaboka Galilea mek ara neik mek bok, Tiberias aboka si silimek mek gwanek sam eer bilimok. **2** Yesus adya yoka'-yoka' lok so' bekna' nauba unuwoka nimi hwelesuka' anyek, eiyiboka nimi nauba dirigoka dobdongoro balamek. **3** Dara, mok soko meinik sam alja yuba doboka diriga ban nang eblaboka welewoka bukumek. **4** Wera ban salek era, Yahudi nang welena' orok roti gwaneng den salek perob sum oka dangamok. **5** Ban sum enyek ara sekoka gokgobok sam nidya' keeb ganagok dara, nimi nauba alak sam yalameka' eiyimok. Dara Pilipus bek, "Ban nimi gong danara dena' denok aboka, nunda har sam dena' dekel binimab do?" aboka heibok. **6** {Yesus ban Pilipus bek wenhyoka' ara, gwaneng dekoka ununa'ara Yesus orowek ella ulumok bok anasa, Pilipus benyek sene heka' hublul do? aboka lebok.) **7** Dara, Pilipus bedya, "Roti gwaneng ara wala' linbadya rupiah wa weboka dekna' ara, ban nimi gong danera meka' dija' anaba ella' gigiwolula' goma'," aboka lebok. **8** Wera dara, ono' yok yuba doboka Yesus ak diriga balamoknya Simon Petrus alja wes Andreas bedya, **9** "Anyagan me hnon roti gwanenga lambadya, hadya' penya bomla bok, wera ban nimi gong mandebna' adya, nidya' gigiwolula' goma'," aboka lebok. **10** Dara, Yesus adya alja yuba doboka diriga ban nang ek, "Ban nimi nauba buknoh aboka orugolulum," hyok. Dara, anyagan ara hola' nauba ulumoka' adya, nimi nidya' hola' dubuk bukumek bok, nengmab ok einimek ara denga salya' yuba' linbadya nang bukumek. **11** Nimi nidya' bukumeka' seleb dara, Yesus ara roti gwaneng doboka, Imik Neyung molowoka, nimi nidya' bukumek nang ak soboka bokoka elekdo yibilisuk. Anasonya neikik, hadya' anaba alja unu dena' nauba senemeka' sunuwoka elegesuk. **12** Seleb pe debgogomek dara, Yesus adya alja diriga ban nang ek, "Ban nidya' sikna' ara meka' me anaba salya' bobogeijik aboka, neika' ak pe mamagolulum," hyok. **13** Dara sikda, nimi nauba lambadya roti gwaneng deregoka dara,

boklomeknya nera serrem obadya mamagol bindiwoka deknemek. **14** Nimi nauba Yesus adya unumok anyek, hyak lokso unumok eiyimek dara, "Lok so bekna' ununumna' lebnelanya sokok an yanamla, youma' wenyalameka' ara wera alan," hyek. **15** Wenyaboka, sikda nimi gong dara, Yesus ak duka' lolowoka sikja senenggom dubnya sekiiwanoba' aboka yanamaka' eiyimok dara, Yesus ara anyagan loboka albeyok gokoka meinik sam bilimok. **16** Ban sum enyek sin dangoka inilyabok dara, Yesus yuba doboka diriga ban nang era, Galilea mek gemek yingginiboka, **17** mek ekla' buna' ak bukumek. Dara, sikda Kapernaum heik binoba' aboka garal balamek. Ban salek era seleb inimok bok, Yesus ara sik dam ak berra yanggumok. **18** Dara balamek bok, senenggom kabo' doroklomok bok adya, mek yakna' neboka eillilimok. **19** Sikda hyak mok mek hnomunga ono' pukgiga balamek jok, saaboka keemek enyek, Yesus ara mek dub pik yan inibgiga mek ekla buna' berem yalamoka' eiyimek. Dara, sikda hyak ganya loka dasuk. **20** Bok, Yesus ara sikenek, "Nera na anasa, ugunda lok ganya bonggom mem," hyok. **21** Dara, alja yuba doboka diriga ban nang edya perob aboka Yesus ak mek ekla buna' ak yalom aboka unul yabek sab-sab, sikja mek ekla buna' era seleb mek gemek lanal bilimok. **22** Ampum so maboka gwelegok dara, or anyagan anam ulumek nim ara, mek ekla buna' ara hnonok ulumok bok, Yesus ara buknggumookanya, alja yuba doboka diriga ban nang ok bukoka seleb bilimeka' eiyimek. **23** Bok, ono' yok mek ekla buna' hnon Tiberias heikek ab yeiniboka Yesus gwanenga soboka Imik Neyung ak molomok enyek demek oulyang berem mal yalamek. **24** Dara nera, Yesus ab alja yuba doboka diriga ban nang ab, anyagan una' eibnggumek dara, nimi nauba ara mek ekla buna' bukoka, Yesus ak ebgiga Kapernaum heikek bilimek. **25** Dara sikda nimi gong dara, eer bindiwoka Yesus ara mek gemek ok an ulumoka' eiyimek dara alak, "Neklesilimnya o, anda hek sum ek anyagan yeilimom do?" aboka heibek. **26** Yesus adya sikenek, "Nara ugunuk dib lebsin, ugunda nak elenulumnya nenera, nadya yoka'-yoka' lok so' ak unulamna' anyek eiyiboka dib seneluma' adya goma'. Ugunda gwaneng deregoka pe demab senelumukanya, nak ebgiga yalanulum. **27** Anasa wera, ugunda blolomla songa lelemla gwaneng emba yeiriwoka wenggom mem. Nimi nonga

ganya embenga' nenelesil gwaneng enesa, yeiriwoka welelulum. Ban gwaneng era nimi diba' me adya eleganesil. Alja neyung bedya pe unulamna aboka alak bekna' beiyimok anasa, alja ugunuk eleganesil," hyok. **28** Dara sikja Yesus ak, "Wera Imik Neyung adya senelelanya nenyek webnoba' aboka, heka' ak unuwanamab do?" hyek. **29** Dara, Yesus adya sikenek ara, "Imik Neyung adya ugunuk unuwaneseng senelamla' ara, alja bokol yeilimoknya bek dib senewoka doloseng senelamla," hyok. **30** Dara sikja, "Wera neyung o, nunda anak dib senewagenoba' aboka, hek lok so' una' nu hogung ek unuwanalam do? **31** Nunja neyung yabo Kanaan heik balamek sum era, mok dum-duma' gwanenga delemek, Nera Imik Neyung adya imik heikek ab, gwaneng eleklesuk aboka, momnya do bek sok, delemek," hyek. **32** Dara Yesus adya sikenek, "Nara ugunuk dib lebsin, Musa bedya imik heikek ab gwaneng eleganggusuk. Bok, nadya' neyung bedya embenga' un gwaneng diba' imik heikek ab eleklesil. **33** Imik Neyung adya eleklesil gwaneng diba' ara, imik heik ab yeiniboka soko nim ek embenga' una' eleklesilnya bera alan," hyok. **34** Dara, sikja Yesus ak, "Neyung o, ban roti gwaneng era, nuk soba' eleklesilom," hyek. **35** Yesus adya sikenek, "Na nong anyek nim embenga' ul eleksin gwaneng era alan. Heknedya nak yanamla dara, alda gwaneng oka soba' unggulumnamla. Ono' heknedyak nak dib senewanenel dara, alda mek ok unggulumnamla. **36** Bok, nara ugunuk seleb wenyasisa sok, ugunda nak okoka nong eillilinuluma' anababya, ugunda nak dib senenggulunulum. **37** Nidya' Imik Neyung adya eleklenel nim era nak yanamak dara, bindowoululum aboka wekdo boboganggunusin. **38** Anasa, nara Imik Neyung heik ab yinggilimsa' ara, nadya ganya doboka yoka'-yoka' unulununa' aboka yanggumsa bok, na bokol yeilinyoknya unuwosulul senelamla' anyek, unulununa' aboka yeilimsa. **39** Na imik heikek ab bokol yeilinyoknya bedya dara, nak seinilenela ara, alja nak eleklenelnya nera, ben hnonok sirik anababya weininggoka dengana' ara mem. Anasa, alda nidya' gobdo sidya' daknamla sum era, embenga' bukiyiwosulul, senelenel. **40** Anasa wera, nadya' neyung bedya alja orowek senelamla' ara, nak heng eiyiboka dib senelemek nimi nidya' ara, dib ulmoubna' ganya dobnamak senelamla. Dara, sidya' daknamla sum era, nara sikenek embenga' bukoka

sekiyiwanesin," hyok. **41** "Nara imik heikek ab yinggilimsa embenga' una' gwaneng era nara alan," hyok. Anasa, sikda Yahudi nang alak wab einimek. **42** Dara sikja, "Al nong ara Yesus, alja' neyung bera Yusuf. Alja' genonga neyung ara nunda seleb ella ulumab bok, hekasa nara imik heikek ab yeilimsa alamlam do?" alamek. **43** Anasa, Yesus adya sikenek, "Ugunda nak waboka lenenggom mem. **44** Nimi ben hnonok anaba nak bokol yeilinyoknya bedya, glina' orok dara, nak yanggunumso bok, sidya' daknamla sum era, nak yanalanya bera embenga' bukoka sekiyiwanamna. **45** Ununumna' lelemek nang bukuk ara, sikda nimi nidya' ara, Imik Neyung adya eimik wenewanesil, aboka momnya domek. Anasa, heknedya Imik Neyung bek pe keboka, alak ab dolomla dara, alda nak or yanenel. **46** Ban wenyhenya nera, nim adya hnon Imik Neyung ara laga eiyirob ak lebnenggubna. Alja bokol yeilimoknya be hnonok seleb neyung bera heng adya okoka eibok. **47** Nara ugunuk dib lebsin, dib senewoka dololonya bera, seleb dib ulmoubna' ganya, alja ganya lomok ulumla," hyok. **48** "Nara nim embenga' una' eleklesin gwaneng era alan. **49** Ugunja neyung yab hola' seknenggulumok sokok, Kanaan heikek Mesir ab balamek sum enyek, mok dum-duma' gwaneng delemek bok, somogomek. **50** Bok, wen lelemna' ara, imik heikek ab yinggilimok gwaneng enyek, delemeija nim era, somoganggunumak. **51** Imik heikek ab embenga' una' gwaneng yinggyuka' ara, na nong ulumna. Anasa, heknedya ban gwanenga delenya bera, hyak sob-soba' or ulmoublumnamlam. Ban gwaneng era nadya nong ek lemna. Nadya nong ek, ban soko nim emba, nim embenga' ulunoka' aboka, eleganamna' ak lemna," hyok. **52** Yahudi nang era, Yesus adya ban wenyalamok yuba kemek dara, sik moumen yu ganya boboka nauba wabdangoka lelemekja, "Ban benera alja nong soub enyek nuk denoka' aboka heka' huboka eleganesil do?" alamek. **53** Wenyek Yesus adya sikenek ara, "Ugunuk hyak dib lebsin, ugunda Imik Neyung adya bokol yeilimoknya bedya alja' nong soub ab, alja eneng eb, denggulumnulum dara, embenga' una' ugunja' nong lomok sam unggulumnesil. **54** Heknedya nadya nong soub ab, nadya eneng eb, delenya bera, embenga' una' seleb ulumlakanya, sidya' daknamla sum era alak nadya bukoka sekiyiwanamna. **55** Nadya nong soub ara, hyak gwaneng nong diba' ulumla, nadya eneng

era, den mek diba' ulumla. **56** Heknedya nadya nong soub eb, nadya eneng eb, delemlya dara, alda nadya' nong lomok sam ulumnamlakanya, nababya alja nong lomok ulumnamna," hyok. **57** "Nadya' neyung be embenga' ululanya bedya nak bokol yeilinyok dara, nababya al adya ok ulumna. Anasonya neikik, heknedy nadya nong ak delenya bera, nadya nong adya ok ulumnamla. **58** Dara, imik heikek ab uboka sokok yinggilimok gwaneng ban e. Ban gwaneng ara ugunja neyung yab edya Kanaan heikek balamek sum delemek gwaneng anaso goma'. Sikda seleb demek dara, nidya' somogek bok, heknedy ban lemna gwaneng denelanya bera, alda hyak diba' ulmoublumnamla," hyok. **59** Yesus adya ban nidya' leboka' ara, Kapernaum heikek Yahudi nim edya yuba don ek ab yuba lelesuk sum enyek lebok. **60** Yesus adya, ban yuba nauba neklesuk sum enyek, alja lelemok yuba dobdongoro balamek nang era, "Ban lelesil yub enera hyak gasa nong anasa, heknedy keboka dobnamso' ak lelemla do?" wenyalamek. **61** Yesus ara, alak yuba doru diriga ban nang era waldalameka' ara ganya lomok eiyisuukanya, alja dara, "Ban yub enedya ugunja ganya dangawom-dangawom aldalalum de? **62** Wera nimi diba' me nera onsok saaboka youma' ulumsa' ak welewanya' eibmun bok dara, heka' hubnalum do? **63** Embenga' ulmoubna' diba' ara Imik Neyung Geisinya adya eleklesil. Nimi nonga migib ara nera salya' nong anasa, nadya ugunuk lelesin yub era, ganya ak anasa, sikda embenga' ulumak. **64** Bok ugun gangganek an, nimi hnon dib senenggululum," hyok. Ban wenhyoka' ara, hek nang dib senewanggunumaka' hnon, al nong ak obnelum aboka yuba dil binimoknya benyek hnon, orowek ella ulumoka' anasa, lebok. **65** Ono' Yesus adya moruwoka, "Nimi ben hnonok sirik anababya, nadya' neyung bedya unuwolula' aboka aranggululunya bera, nak sam yanggunumla, amsa' ara, hnon dib senenggululuma' anasa lemsa," hyok. **66** Ban wenhyok sum enyek moruwoka, alja lelemok yuba doru diriga ban nang nauba ara, losaaboka alak diriga banggulumek. **67** Dara, Yesus adya alja obadya diriga ban nang ek, "Ugumbabya hnon binimab senelelum de?" husuk. **68** Dara, Simon Petrus bedya Yesus ak, "Neyung o, nunda heknya ak binisibya do? Embenga' ulmoubna' yub ara anak danyek ulumla. **69** Anak danyek, Imik Neyung adya geisa' ak bokol yeilinjoknya ululama' ara, nunda

dib senewoka ella ulunjab," hyok. **70** Danyek, Yesus sikenek, "Wei, ugunda obadya nang enera, nadya sekiyisisa' an anano? Bok, ugun gangganek ara, ben hnon bisa' me ulumla," hyok. **71** Ban wenhyoknya nera, Simon Iskariot bedya me Yudas bera, obadya nang ulumekjok, al hnonok yuba dil binimoknya benesa lemok.

7:1 Ban nidya' seleb unuwoka lebgogomok dara, Yahudi dub nang edya obnoba' aboka ulumeka' anasa, Yudea sokok yibinggunusinya senewoka, Galilea sokok sam uru yabalamok. **2** Ban salek enyek, Yahudi nang edya gal mekla' sangan sum perob sum oka dangamok. **3** Dara, Yesus ak alja weisa badya lebekja, "Anda yoka'-yoka' unulumen dara, anja yuba doboka diriga yalamak nang eillilinggenok bar aboka, anyagan Galilea sokok loboka, Yudea sokok binilam. **4** Nimi ben hnon alja lok so' unulamla' ara, laga senenggoma' nidya' oboka lelewolula' aboka dara, doknoboka gelelenga unuwanggunumso. Seleb unulumama' anasa, nimi nidya' hogung ak amalesilom," wenhyek. **5** Alja weisab eneba, Yesus ak dib senewangumekjok lemek. **6** Dara, Yesus adya sikenek, "Nasamba dara, unun salek anam bok, ugunsamba ununa' ara salya' ulumla. **7** Soko nim edya dara, ugunuk ara lek senenggulusak bok, nak dara, sikja unulumaka' anyek, malya' aboka pyaga' geblamna' anasa, sikda nak lek senelenyak. **8** Yahudi nang adya senenggoma' perob sum meewanamaka' ak ara, or ugumbeyok bululum e. Nak ban salek era anam unggulumla' anasa, binggunumna," hyok. **9** Ban wenyamookanya, alda Galilea sokok sam or ulwenelemok. **10** Bok, alja weisab era seleb perob sum meewanoba' aboka Yerusalem heikek bilimek dara, ono' albabya eimik gelelinga aboka dobgiga nim eilina' oroka' anyek bilimok. **11** Dara, Yahudi nang era, senenggoma' memelemeka' ak sam Yesus yalamla gom aboka kemelemekanya, alda hanyagar ulumla do? aboka heilisik. **12** Dara, ban perob sum enyek, Yesus amba o lomok yuba nauba saro yabalameekanya, hnon nim edya dara, "Alda perobnya," alamek. Bok ono' hnon nim edya dara, "Orok, alda nimi malya nengewoka sonda' amba bobnenewoka lelesilnya," alamek. **13** Bok, Yahudi dub nang enyek lok anasa, nimi ben hnonok adya' anaba, laga lebnenggumek. **14** Yahudi nang perob sum anam

mamagemeka' hnomung bok, Yesus ara Imik Neyung ek wekoka anyagan yuba leb einiwousuk. **15** Dara, Yesus adya lero neklesuk anyek eiyiboka, Yahudi nang ganya loka daboka lelemekja, "Alda sekolah dona' ara orok bok anasa, heka' adya ban anaso lero neklesil do?" alamek. **16** Anasa, Yesus adya sikenek lebokja, "Nadya neklesinya nenera, nadya goma'. Alda Neyung be na bokol yeilinyoknya bedya lenyoka' ak neklesin. **17** Imik Neyung senelamla' anyek, dib unuwonun senelelanya bera, nadya neklesina' anara, nadya ok ganya doboka salya' neklesin gom, Imik Neyung ak aba' ak neklesin gom ara ella danamla. **18** Nimi be hnon alja neklesila' ara, alja ganya doboka sonda anasa, lelemla dara, alda yok nim edya nak gigilenenoka' aboka hogung bo amalamla bok, al bokol yeilinyanya bek si imik dolula' aboka lelelanya bera, alda hyak dib ok ulumlakanya, alak ara sonda' yuba unuruwa' ara alak meka' unggulumla. **19** Musa bedya nim onggom, yoka' salya' ununggom aboka, Imik Neyung adya unuwanalum an yub era seleb ugunuk elegosuk. Bok, ugunuk dara, be hnon ban yub en keboka ununggulumla. Dara, hekasa nak obnenoba' aboka ulunulum do?" hyok. **20** Dara ban nimi nauba longomek nim edya alak, "Anda bisa' saleka lenggel de? Heknedya anak ara obgununa' ulunggela' anasa lelelam do?" hyek. **21** Dara, Yesus adya sikenek ara, "Nadya dara, lok so' ara seleb hnonok unuwasa dara, ugunda seleb eiyiboka ganya loka dabsuk. **22** Bola' garelelulum aboka, Musa bedya yuba weboka elegosuka' anasa, Sabat mem sum bok, merewoka bola' garelelum. Dara, ban yub era Musa bedya gom, alda nunja' neyung yabo Musa be anam salek men youma' anyek orowek bola' garelemek. **23** Ugunja ban unululumnya nedya, Musa bedya unuwanalum an yuba blekibyek aboka unululumjok, nak dara, nimi nong ak Sabat mem sum bok hwesinya nenyek, hekasa walanulum do? **24** Anasa, ugunda laga eillilumnya nenesa leboka, salya' yana lelena' ara loblulum. Alda domdigum pe yana lelelelulum," hyok. **25** Dara, Yesus adya nidya' ban wenyaboka neklesuk sum anyek, Yerusalem heik yoka' nim edya, "Yahudi dub nang edya obnoba' aboka elemaknya bera alan gom? **26** Wera kendululum, alda laga sekoka neklesil bok, nim yok nim edya yuba alak sal eleknenggulumak. Anasa, nunja Yahudi dub nang adya dara, Imik Neyung adya Kristus nimi blebsina' dubnya eleganesin amoknya bera alan,

eiyimaka' anasa, lolomak gom? **27** Bok, Imik Neyung adya sokok nimi blebnamla aboka yanalanya Kristus ara, al yalya pik era, nim adya dara, ella danggunuseng bok, ban benyek dara, alja mok nunda seleb orowek ella ulumab." **28** Dara, Yesus ara Yerusalem Imik Neyung ek sam anam lelesuukanya, yuba senenggoma' bii aboka lelemokja, "Al dib, ugunja dara, nara ella ulunulum. Nara hekmok eba' ak yasa' ara ella ulunulum bok, nara yasa' ara nabeyok salya' ganya doboka yanggubsa. Bok, na bokol yanyoknya bera alda hyak dib nong ulumla. Ugunda alak elgom ululum bok, **29** nara alak ab bokol yanyoka' anasa, nara alak ella ulumna," hyok. **30** Ban sum enyek Yesus ak Yahudi nang edya salawoka henga gobnoba' aboka ulumek bok, alja unun salek anam danggumoka' anasa, nimi soruk hnonok sirik anaba alak salawangumek. **31** Bok, nimi nauba longomek nim era Yesus ak dib senewoka lelemekja, "Kristus adya nimi blebnesil aboka eimik eleganesilnya yalya dara, ban ben unulamla sok, yoka'-yoka' lok so' anyek bekna' diba' unuwanamla de?" hyek. **32** Parisi nang edya, nimi nauba Yesus ak migiboka yuba ngorokna' dero balameka' kemek dara, sikeneb, yuba wa gaka' dub nang eb dadya, Imik Neyung ek keeboka bo ulumek nang ek, salawoka henga goubol bululum aboka orugumek. **33** Danyek, Yesus adya lebokja, "Nara sokok an ugunublaboka ulumnamab salek era, hyak mek ok ubla' anasa, ban nen seleb dara, na bokol yeilinyoknya bek saaboka binimna. **34** Nadya ulumnya' ak ara, ugunuk dara, yamenggom anasa, ugunda nak elemnelum bok, eibnenggununulum," hyok. **35** Dara, Yahudi nim sik moumen heibdangoka lelemekja, "Na binya' ak ara ugunda eiyiboka yanggunusom alasil dara, heka' huboka eibnenggunusibya' anasa lelemla do? Gom, Yahudi nim enyek, Yunani nim eblaboka mok sam soboka ulumak nim ek biniboka, Yunani nim ek neklesununa' aboka lelemla gom? **36** Ugunda nak elemnenulum bok, eibnenggununulum, ugunda na ulumnya' ak ara, yanggununulum alamla dara, hek damok enesa lelemla do?" aboka lelemek. **37** Yahudi nang edya perob sum sidya' longob dakamek sum enyek, Yesus ara sekoka bii aboka yuba nauba lelemokja, "Heknedya mek ok ublya dara, or nak an del youlul. **38** Imik Neyung yuba momnya doboka' ara, heknedyak nak dib senewanenel dara, alja ganya lomok ab sam nim embenga' una' meka

goblemnamlam," hyok. **39** Yesus adya ban wenhyoknya nera, Imik Neyung adya' Geisinya benesa lemok. Ban salek era, Yesus si anam imik nenewanggumeka' anasa, Geisinya bera anam eleganggusukjok, Yesus alak dib senewanamak nim era Geisinya dobnamak aboka lelemok. **40** Ban wenyaboka Yesus adya yuba leboka neklesuk sum enyek, nimi darasam sik gangganek sam ab lelemekja, "Senenggom ununumna' lesinya eimik yanamla alameknya bera alan e," alamek. **41** Bok, ono' yok nim edya lelemekja, "Soko nimi blebsina' dubnya Kristus bera alan," alamek. Bok hnon yok nim edya dara, lelemekja, "Mab e, nimi blebsina' dubnya bera Galilea sokok aba' ara ura yalamso goma'. **42** Imik Neyung yuba momnya doboka' ara, soko nimi blebsina' dubnya Kristus bera, Daud nang yila' ak bok anasa, Daud ulumok heik Betlehem heik ab ara yanamla hyok," aboka lelemok. **43** Anya wenyaboka, nimi nauba Yesus amba ganggana' lolobdangoka obdanoba' ulumek. **44** Dara hnon nim edya, Yesus ak salawoka henga goubnoba' ulumekjok, ono' Yesus ak ara, soruka meka' bebeganggumek. **45** Ban sum enyek, nimi pika welesik nang edya, pik losaaboka yeilimek dara, Parisi dub nang eb, Yahudi yuba wa gaka' dub nang eb dadya, sikenek heibsika' ara, "Ugunda hekasa Yesus ak salawoka henga goubnenggulum do?" aboka heibsik. **46** Pikek welesik nang edya lelemekja, "Nimi soko nim era, ban benedya lelemla sok hyak lenggulumak," alamek. **47** Dara, Parisi nang edya pikek welemek nang ek ara, "Dara, ugumbabya hnon aladya gliboka bo balasil de? **48** Nimi hnon Yahudi dub nang ek ab hnon gom, Parisi dub nang ek ab hnon gom, Yesus ak dib senemek de? **49** Bok, nimi nauba Musa bedya unuwanalum an yub ek elgom ulumak anasa, wera sikenek malya ullisina' ak ulusil," aboka wabsik. **50** Dara, Nikodemus bera, neikek hiboka yuba salameknya bok, al men Yesus ak bilimoknya bek adya sikenek lebokja, **51** "Nunja unuwanalum an yub ek ulumla' ara, ben hnonnya bek alja unulam so' anyek keboka eibnenggusibya bok dara, yana lelewanesibya de?" hyok. **52** Sikda alak, "Wei, ambabya Galilea mok ebnya de? Nidya' Imik Neyung buku sam lelewoka einiwanalamakanya, ununumna' lelelanya bera, Galilea mok eba' ara, yanggunumla' eibnelam," hyek. **53** Dara, sikda nidya' sikja ek byik.

8:1 Bok, Yesus ak dara, Zaitun meinik sam bilimok. **2** Ono' Yesus maboka gwelegok dara, hyak luguna' nong enyek, Yerusalem heikek Imik Neyung ek yeilimok. Dara, nimi nauba al damak mamagal yeilimek dara, alda bukoka, ono' Imik Neyung yuba sikenek lelesuk. **3** Ban salek enyek, Yahudi yuba neksin nang eb, Parisi nang eb dara, malya umok gel gek bomeekanya, Yesus ak yeiniboka gel ak anda hnon laga seklom aboka orugomeekanya, **4** Yesus ak lelemekja, "Neklesilimnya o, ban gel gen era malya ul yabok enyek eiyimaka' anasa, bo yeilimab. **5** Dara, Musa bedya unuwanalum an yuba nuk lebsuka' ara, ono' ban anaso malya ubija geleb ara, girik adya salya' ololulum amok anasa, wenyek anja dara, heka' senelam do?" aboka heimek. **6** Ban nenera, Yesus adya dara hek hulul do aboka, alja wenyhelya' yub edya alak malya uyiwanoba' aboka sene heimek. Bok, Yesus sokok sam genib lobinggoka, soruk adya soko dubuk momnya dolomok. **7** Yahudi nang adya sene hek hulul do aboka Yesus ak saaboka heildibilloklemek dara, alda sekoka sikenek lebokja, "Wera or ugun gangganek sam ara, malya una' oroknya bedya, gel genyek, men girik adya doboka oblul," hyok. **8** Dara, Yesus ara onsok sokok genib lobinggoka soruk adya soko dubuk momnya dobok. **9** Yesus adya ban wenhyok yuba kemek dara, Yahudi nang era, nauba nang sok ab ara, mek nang ek moruwoka, hnonok-hnonok sen-senem aboka balameekanya, dengaboka, gel ab Yesus ab ok, anyagan lobsik. **10** Dara, Yesus ara sekoka gel genyek lebokja, "Genong o, sikda har sam byak do? Anak ben hnon ogena' orok de?" hyok. **11** Wera, gel genedya Yesus ak, "Neyung o, yo orok," hyok. Dara, Yesus adya malya umok gel gek lebokja, "Nababya obnenggununggena' anasa, amba or binilam bok, wenera malya una' pik ara hyak lobongganalam," hyok. **12** Dara ono', Yesus ara nim ek yuba lelesuk dara, lelesukja, "Nara sokok an dilina' ulumna e. Anasa, nak diriga yalanelnya bera, alda embenga' dilina' ak sam ulmorulumnamla," hyok. **13** Dara, Parisi nang adya Yesus ak lebekja, "Anja unululama' ak ara, an damnya bedya ok leldalalama' anasa, ban yuba dib senewanggunenjab," hyek. **14** Bok, Yesus adya Parisi nang ek lebokja, "Na yasa' ak ara, ono' saaboka binimna' ara, ella ulumna bok, ugunuk dara, hyak dib lelemna. **15** Ugunda nim adya unulumaknya nenesa sunuwoka yana lelelelum bok, nak

dara, nimi hnonok sibin anaba yana kinggulusin. **16** Dara ono' hnon, nabeyok unggulumna, Neyung be nak sokok bokol yeilinyoknya bera, nablaboka ulunama' anasa, nadya yuba lelel yabasinya dara, hyak bekna' dangalamla. **17** Musa bedya unuwanalum an yuba momnya doboka' ara, Nimi penya yuba lelerak dara, nera pero balamla, alamla. **18** Anasa, nadya unulamna' ak dara, nak hnon leldalamna. Neyung be, na sokok sam bokol yeilinyoknya bedya hnon nak lelenel," hyok. **19** Parisi nang edya alak, "Anja' neyung bera hanyagar ulumla do?" aboka heimek. Dara alja dara, "Nunda penya nidya' ugunja dara, elgom ulusulum. Ugunda nak ella ubnesom dara, wera nadya' neyung anaba ella ubnesom," hyok. **20** Yesus adya ban nidya' wenyaboka leboka' ara, Yerusalem heik Imik Neyung ek sam rupiah beillilimeka' ok berem sekoka lemok. Bok ban salek era, alak obnemek salek anam danggumoka' anasa, nimi hnon alak salawanggumek. **21** Dara ono' Yesus adya, hnon saaboka leboka' ara, "Nara binya dara, ugunda nak elemnenulum bok, ugunuk dara, ugunda malya ubgiga balamnelumukanya, somoklomnelum. Ugunda na binya' ak ara, ugunda yamenggom dangalemnesil," hyok. **22** Dara, Yahudi dub nang adya heibdangoka lelemekja, "Na binya' ak ara ugunda yamenggom alamla' anasa, al damnya obdanamla' ak lelemla de?" aboka lelemek. **23** Dara, ono' Yesus adya sikenek ara, "Ugunda sokok ab yeililum, nara imik ab yeilimsa. Ugunuk dara, anyagan sokoknya nek ululum, bok nak dara, anyagan sokoknya bek unggulumna. **24** Ban damok enesa leboka, ousa era, ugunda ugunja malya una' ak sam somoganalum abmeisina' ara, ban nenesa lebmecin. Nera aldib, ugunda nak, bera alan senewoka, dib senewoka dobnenggununulum dara, ugunja meneng malya una' lomok sam somoganalum," hyok. **25** Dara Yahudi nang edya, "Wera anda ono' heknya do?" aboka heibek. Danyek Yesus adya sikenek lebsuka' ara, "Soba' lelesin sok ok ulumna. **26** Nadya ok ganya doboka yuba nauba ugunuk nekoka yana lelewanasisinya. Bok, nak bokol yeilinyoknya bera dib nong ulumlakanya, alja anyek leblul senewoka neklenelnya nok sokok lelemna bar," hyok. **27** Dara Yahudi nim edya dara, Yesus bedya ban wenyaboka lelemla' ara, Imik Neyung amba lelemla senewoka ella danggumek. **28** Anasa wera, Yesus adya ono' sikenek ara, "Ugunda Imik

Neyung adya bokol yeilimoknya nimi diba' me, imik beibnelum sum enyek, nara heknya ulumna' ara, ella danalum. Dara, ono' nadya yoka'-yoka' unulamna' ara alja ganya doboka ununggulumok, alda al bokol yeilimoknya bedya lelemoka' ok sunuwoka lelemoka' ara, ella danalum. **29** Neyung be sokok sam bokol yeilinyoknya bera, nablaboka soba' neikik ulunam. Nara alja ganya perob senelamna' anyek, soba' unulamna' anasa, alda nak lo banggulunel," hyok. **30** Yesus adya ban nidya' wenyalamok sum enyek, nimi nauba alak dib senewoka domek. **31** Dara, ono' Yesus adya Yahudi nang alak dib senemek nang ek lebokja, "Ugunda nadya lelesin yub ek salabmoubmun dara, aldib, ugunda nak diriga yalalum nim ulumnulum. **32** Ban nenyek dib unulumun dara, aldib ugunda hekab-hekab dib ulumla' ara ella danalumukanya, ban dib una' enedya ugunuk gobdo lob lobnesil," hyok. **33** Sikda alak, "Nunda Abraham nang yila' ulumabakanya, nunda yok nimi wa wen nimi dangana' orok anasa, anda hekasa ugunda yok blebdangoka seknelum alasilim do?" hyok. **34** Anasa Yesus adya leboka' ara, "Nara ugunuk hyak dib lebnesin, Heknedya malya ululanya bera, alda malya una' amba wa wenya ulumla. **35** Wa welemna nang era, wa welenanya bedya ek ara soba' ulmorunggulumla bok, alja me yoka' ak dara, alja ek ulmorulamla. **36** Anasa wera, Imik Neyung me adya ugunuk bleboka sekiiwesilya dara, wera danyek ugunda aldib seleb blebiyiwosuk nimi dangoka ulumnalum," hyok. **37** Dara, ono' Yesus hnon leboka' ara, "Ugunda Abraham nang yila' ululuma' ara eillilisin bok, nadya yub enyek ugunja ganya lomok sam doboka beilina' orok bok adya, ugunda nak obnenoba' aboka ulunuluma' ara, nara ella ulumna. **38** Bok ugunuk dara, ugunja' neyung be yoka' adya lebnanya nok unululum. Neyung benya neika' ulunuma sum enyek eiyimsa' anyek, nara lelemna," hyok. **39** Dara, Yahudi nang lebekja, "Nunda neyung be yoka' ara Abraham ulumla," hyek. Dara, ono' Yesus adya sikenek lebsukja, "Ugunda Abraham nang yila' dib ulusom dara, alja pe unulumoka' anyek unulumnosoma'. **40** Nara Imik Neyung ak ab, dib yuba keboka neklesin bok, ugunda nak obnenoba' aboka dulunulum. Abraham bek dara, ban anaso unuwanggumok. **41** Ugunda ugunja' neyung be yoka'-yoka' unulamla' anyek unululum," hyok. Dara, sikja alak, "Nunda beiyik ab beiyisin nimi goma'. Nunja' neyung be nong

diba' ara al Imik Neyung hnonok ulumla," hyek. **42** Dara, Yesus adya Yahudi nang ek leboka' ara, "Imik Neyung ara ugunja neyung be yoka' ulumso dara, nara nabeyok ganya doboka salya' lelem sokok an yanggubsa bok, Imik Neyung adya bokol yeilinyok anasa, ugunda nak wana' ulumnesom. **43** Hekasa ugunja ganya lomok sam ara, nadya lelesin yub era ella unggululum do? Nadya lelesin yub ek dara, kebla henggonggom ululuma' adya ella unggululum. **44** Ugunda bisa' dubnya bedya mab ululum. Ugunja' neyung Iblis dubnya bera hyak youma' ek moruwoka dib osina'anya ulumlakanya, alda hyak dib una' alak meka' unggulumla. Dib yub ak sam meka' uruma doboka neika' una' ara hyak unggulurak. Alda sonda' lena' hwam dubnya ulumlakanya, sonda' lelemla' ara aljinya nenesa, doumdigum dangalamla. **45** Bok nak dara, dib yub ek lelesin bok, ugunda nak dib senenggulunulum. **46** Ugun gangganek ab nimi ben hnonja nak sam anda malya ulum aboka bekna' laga aawaneneso de? Orok bok dara, dib nong yuba lelemna dara, ugunda hekasa nak dib senenggulunulum do? **47** Imik Neyung ak, al yalamak nim era Imik Neyung yuba perob aboka ganya gwelelek aboka dolomak bok, ugunda Imik Neyung mabo diba' unggululuma' adya, kenggululum," hyok. **48** Yahudi nang edya Yesus ak lebekja, "Imik Neyung yuba dona' elgom nang Samaria nimi bisa' gologoknya anjuba' ara, dib lenjuba do?" hyek. **49** Bok, Yesus adya sikenek, "Nara bisa' gologanenggom. Nara Imik Neyung bek imik nenelamna bok, ugunja danyek, nak derewoka walenum. **50** Nara nadya ok ganya doboka nimi giblenoka' aboka imik neneldanggulumna. Bok Neyung bedya alja ganya doboka nak gibnoka' aboka memelenel. Alda dib yana lelenanya ulumla. **51** Nara ugunuk dib lebsin, nadya yub ek dib senewoka unululanya bera, alda somokna' hyak loboka ulmoublumnamlamla," hyok. **52** Dara Yahudi nang edya, "Nunja' neyung Abraham beb, yok-yok senenggom ununumna' lelemek nang enebabya, seleb somogek bok anasa, anja dara, nadya yub ek dib senewoka unululanya bera hyak dib somoganggunumla alama' adya, wera aldib anda bisa' gologonjoknya ululama' ella ulunjab. **53** Nunja' neyung Abraham beb, nidya' ununumna' lelemek nang era nidya' seleb somogomek bok lelelama' anasa, anda heknya do? Anda hyak senenggomnya bek ululam, Abraham bera meknnya

bek, anasa lelelam de?" hyek. **54** Dara Yesus adya sikenek lebsuka' ara, "Nara nim adya nak giblenenoka' aboka hogunga bo eldalasinya dara, dib danganggulumneso. Bok nadya' neyung, ugumba nunja' neyung alalumnya, Imik Neyung bedya imik nenelenel. **55** Dara nera, Imik Neyung bek ara, ugunda elgom ululumjok, salya' lelem lelelum. Bok nak dara, alak seleb ella ulumna. Nadya Imik Neyung bek, nara alak elgom ulumna henesinya dara, ugun ululum sok, senenggom sonda'anya ulumnesinya. Bok, nara Imik Neyung bek ella ulumnakanya, alja yub ek dib senewoka unulamna. **56** Ugunja' neyung Abraham bera, nadya sum eimik yenewanamla' eibnamna' anyeka' aboka, alda hyak ei-ei ganya bolomok. Wera anasa, eimik seleb eibuk dara, hyak eiya dabok," hyok. **57** Dara, Yahudi nang edya alak, "Bablong o, anda gibna' denga penya ubnenggulam bok, Abraham bek seleb heng eiylum de?" hyek. **58** Dara, Yesus adya sikenek, "Ugunuk dib lebsin, Abraham bera anam unggulumok salek, nak men ulumsa," hyok. **59** Banyek kemek dara, alak obnoba' aboka girika dol yabek bok, Yesus ara dengaboka Imik Neyung ek sam ab loboka byuk.

9:1 Dara, Yesus ara pikek sam yabalemookanya, naubenya bok beiyimek salek eba' ara henga luma yeilimoknya bek hnon eiylimok. **2** Dara, Yesus yuba doro diriga ban nang edya Yesus ak, "Neyung neklesilimnya o, ban nenera hekasa anam beibek salek eba' moruwoka henga lum ubmoruwok do? Nera damok ara alja malya una' edya gom, alja' genonga neyung adya sikja malya una' edya ubok gom?" aboka heibek. **3** Dara Yesus adya, "Anam beiyimek salek eba' henga lum ubmoruwoka alja malya ulumoka' amba, alja' genong alja' neyung adya malya ulurek amba goma'. Alda Imik Neyung migib adya welemla' laga dalya enyek nim eibnoka' aboka ubok. **4** Guna' yanamla salek era wa webnamenggom anasa, yubyek dilina' ubla salek ok, na bokol yeilinyoknya bedya wa era yeiriwoka welemnemab. **5** Bok, nak anam sokok ulumna salek enera, nara soko amba dilina' ulumna," hyok. **6** Yesus adya wenyaboka lebgogomok dara, gamala' sokok solowoka, gamala' ak an soruk adya sokok ninim-ninim amoka' seleb dara, henga lumnya bek alja heng ek sam ngikikookanya, **7** alak lebokja, "Siloam mek gwanek anja hogung enyek mek elegeldal bilom," hyok.

(Siloam ara nunja yub era orugomoknya ulumla amla). Henga lumnya bera bilimookanya, seleb mek elekdok dara, on pik saaboka heng eibgiga yalamok. **8** Bok, henga lumnya bedya e ok berem nim eb, al bulumoka' soba' eillilimek nim eb dadya, "Pikek sam soba' yoka'-yoka' mololdo bulumla' eillilimabnya bera alan gom?" alamek. **9** Dara, hnon nim edya dara, "Bera alan," alamek. Bok, ono' hnon nim edya lelemekja, "Yok nang bok, henga luma yoknya bedya hogung eneso ulumla' adya," alamek bok, henga luma yeilimoknya bedya lebokja, "Nara mololdo bulusinya bera alan merewan an," hyok. **10** "Dara, heka' hunggela' adya anja heng era luma dengaboka onsok eika' merewalam do?" aboka heibek. **11** Dara alja lebokja, "Yesus aboka si silimaknya bedya, soko anyek bena meewoka, nadya' heng ek ngiknelekanya, Siloam mek gwanek hwildal bilom aboka orugunel dara, nara Siloam mek gwanek hwil bilibman dara, nadya henga lum ara dengaboka merewan," hyok. **12** "Dara, bera hanyagar do?" aboka heibek bok, alja dara, "Nab elgom," hyok. **13** Dara, bera doboka bobek dara, Yahudi dub nang ek bo byik. **14** Yesus adya sokok gamala' solowoka bena niniwoka henga lumnya bedya henga gwelegoka hwemok sum era, Yahudi nang Sabat mem sum ek hwemok. **15** Wera ono' Yahudi nang edya, "Anda heka' hulama' adya anja heng ara merewoka kemelelam do?" aboka heimek. Dara, alja lebokja, "Ben hnonja ben anyek gamala' ablaboka niniwoka nadya' heng ek an nininelekanya, mek elegeldal bilom aboka oruganel enyek, mek elekdan dara, merewoka eiyimna," hyok. **16** Dara, Parisi nang hnon nang edya lelemekja, "Sabat mem sum bok alda wa welemla' anasa, alda Imik Neyung ak ab yanggubok," alamek. Bok, hnon nang edya danyek, "Malya una'anya bedya anaso lokso' anyek bekna' diba' unuwanamso' goma'," aboka nauba lelemeekanya, sik moumen ganggana' lololdalemek. **17** Dara, ono' heng luma yeilimoknya bek saaboka lebekja, "Anja henga seleb hwebgela' anasa, anja dara, heka' alak lebnelam do?" hyok. Dara, alja leboka' ara, "Alda ununumna' lena'anya ulumla," hyok. **18** Bok henga luma yeilimoknya bek, alda men danyek aldib luma yeilimok bok, wen era henga gwelegal aboka dib senena' loboka, henga lumnya alja' genong neyung ak yorurum aboka lebekja, **19** "Ban ara aldib ugunja henga luma umoka' ak beibdum me nera alan de? Dara ono' Hekasa wenyek dara,

henga gwelegal do?" aboka heibsik. **20** Dara, henga lumnya bedya alja genonga neyung adya lebdekja, "Aldib beiyinum sum enyek henga luma dookanya, alda nunja me yoka'," herek. **21-22** Bok Yahudi nang edya, nimi nidya' ak lebekja, "Kristus ara nimi blebsina' dubnya al yabija nim era yuba dona' lobnamak," hyeka' anyek, lok ganya boreka' anasa, sik nang penya edya lebdekja, "Heka' humla' adya henga gwelegala' ara numba elgom ono' heknedyu umla ek meremla' ara nunda elgom anasa, alda seleb nauba neboka' anasa, nara ban adya henga luma denganel henelula' aboka alak heiblulum." **23** Yahudi nang edya malya nenewanasab aboka lebeka' anyek lok anasa, alja' genonga neyung adya, "Alda seleb nauba newoka' anasa, alak heiblulum," herek. **24** Dara, ono' henga luma yeilimoknya bek yalom aboka youbomek dara, "Ban ununggelnya benyek malya una'anya ulumla, ella ulumaba' anasa, henga luma denganggela' anyek, anadya unel aboka Imik Neyung si ok giblom," hyek. **25** Wera, henga lumnya bedya sikenek lebsuka' ara, "Nak hwenehnya bera, alda malya una'anya gom, perobnya gom ara, nara elgom. Hnonok ella ubna' ara, youma' dara henga luma ulunyok bok, sum enyek merewana' ok ella ubna," hyok. **26** Bok, ono' Yahudi nang edya saaboka heibeka' ara, "Heka' anak unuwagel do? Ono' anja dara, heka' huboka henga gwelegoka eiyilam do?" aboka heibek. **27** Dara, sikenek lebsuka', "Nara ugunuk seleb saaboka li penya neksin bok anasa, ugunda alja diriga ban nanga danoba' aboka lelelum gom? Hekasa soba' saaboka heilinulum do?" aboka lebok. **28** Dara, henga luma umok bok meremoknya bek waboka lebekja, "Anak danyek Yesus bedya yuba donya bok, nunda Musa bedya yuba don nang ulumab. **29** Nunda Musa benyek Imik Neyung yub adya alak yuba salamoka' ella ulumab bok, anja lelelamnya bera hanyagarab yoka' anaba numba elgom ulumab," hyek. **30** Alda wenhyoka' ara, "Wera loka dabnel! Nak seleb henga lum sirika' nong bok hwebnel enyek gwelegoka eibnabok, ugunda al yok pik elgom ululuma' anasa, loka dabnel. **31** Imik Neyung ara malya una' nim edya molona' kenggulusil bok, alda pe uboka alja senelamla' ok unulumak nim enyek sikja molona' kelesil. **32** Youma' ek moruwoka wene salek enera, me beillilamna sum ek ab henga luma unanya bera, nim adya heng gwelegiyimek ana' ara kenggulumak. **33** Nak hwebnelnya bera, Imik

Neyung ak ab yanggumso dara, alda yoka'-yoka' unuwanggunumso," hyok. **34** Dara, Yahudi nang edya alak lebekja, "Anda hyak beiyik ab beibjeknya bok anasa, anja nuk neklesilima' de? bilom," aboka yakek. **35** Yesus ara alja henga lumnya bok hwemoknya bera, Yahudi nang edya alak yakeka' kebok dara, alak eiyiboka lebokja, "Anda nimi diba' me nek dib senelelam gom orok gom?" aboka heibok. **36** Bok ono' hwemoknya bedya Yesus ak lebokja, "Wenelesilimnya o, nera heknya ek lelam do? Nara alak dib senewonuna' aboka neknelom," hyok. **37** Dara Yesus adya lebokja, "Bera al anab neika' wen an yuba salarum an, seleb heng eiyilam an," hyok. **38** Dara, henga luma bok meremoknya bedya, "Wenelesilimnya o, nara dib senewan," wenyaboka Yesus ak koma lumugoka gimok. **39** Dara, Yesus adya, "Nara sokok an yeilimsa' ara, pe yana lelewoka unululanya nenyek, henga lumnya nenyek, henga gwelegoka eillilimnemak bok, heng eika'anya nera luma yalalula' aboka yeilimsa," hyok. **40** Hnon neika' ulumek Parisi nang edya ban leboka' kebok dara sikja, "Dara, ban wenyalalama' anasa, numbabya heng ubsuk de?" hyek. **41** Yesus ara sikenek, "Ugunda henga lum diba' ulusom dara, ugunuk ara malya una' nang henggunusisinya. Bok, heng larawoka eillilimab alaluma' adya, malya una' lomok anam ululum," hyok.

10:1 "Nara ugunuk dib lebsin, Nimi ben hnon, domba pama pik yoka' ak wekna' loboka yok pik gelelenga meknewoka weklelanya bera, alda hoka' donanya ulumla. **2** Anasa wera, domba pam pik yoka' ak uboka weklelanya bera, pama beilinya yoka' nongnya bera alan. **3** Pam leka' ak sam welelanya bedya dara, pama beiyek yibinoka' aboka pika bakna dara, pam ara damnya bedya yuba keboka, nidya' ella' gigiro si yok-yok silisin dara, beiyik goboka mengelesil pika balamak. **4** Domba pama gong dara, nidya' seleb beiyik sam bo goubsin dara, domba damnya bera mengewoka balamna dara, sikda alja yub orowek ella ulumaka' adya, keboka eimik diriga balamak. **5** Bok yok salya'anya bek dara, alja yuba sana' elgom adya, yoknya bedya youbol yabasuso dara, alak kena' loboka yeiri biniseng," hyok. **6** Dara, Yesus adya ban yuba sunuwoka lebsuk bok, sikja dara, damok ara anasa lemla senewoka ella danggumek. **7** Dara, ono' hnon

saaboka leboka' ara, "Nara ugunuk dib lebsin, Na nong anyek domba pam amba pik diba' ulumna. **8** Na pam damnya anam yanggunabok, yok nim anyek men yalameknya nera, hoka' dona' nang ek yalameekanya, sikja yuba sana' yok anasa, domba adya sikja yuba kenggulumek. **9** Nara pik nong diba' ulumna e. Heknedya pik diba' ak uboka weklelanya bera alak blebnamla. Dara, pik diba' pik bini yeini uboka perob dena' deregoka ulumnamla. **10** Hoka' dona' nimi yalamak dara, hoka' dobnun, nim obnun, malya uboka soldob menegonuna' aboka yalamak bok, nak dara, embenga' una' diba' elegoka, hyak nauba pe ulunoka' aboka yeilimsa," hyok. **11** "Nara domba pama pe beilinya diba' ulumna e. Domba pama pe beilinya dibnya bera, alja nong anyek pam amba somogamnya' anaba senelamla. **12** Bok, salya'anya rupiah deknenjaba' anasa, pama gregoka bo ululom ananya bera bo ulunabok, bei gama yanggana' eibna dara, nadya pam goma' senewoka, lok anasa pama loboka yeiri balamla. Dara, bei gam adya domba pama nidya' ara doluwoka ob menegoka yaklamla. **13** Salya'anya bera alda dekna' amba ganya hwiboka welemlakanya, domba pam ak ganya goluwoka bo unggulumla' adya, bei gam adya domba obnuna' aboka yanggan dara, alda lok anasa yeiri balamla. **14-15** Nara pe domba pama beilina' yoka' nongnya ulumna e. Neyung bedya nak ella ulunelekanya, nababya alak ella ulumna sok, anasanya neikik nababya nadya domba ak ella ulusin dara, sikda nak ono' ella ulunyak. Anasa, nara siksamba somogonun senelamna. **16** Dara ono' nadya domba pam gong dara, yok leka' ak sam hnon ulumak. Sikbabya hnon anyagan bo yanasin. Dara, sikda hnon nadya yuba pe keboka, anyagan orowek men ulumak pam eb neika' ak hibnya dara, nadya yoka' pama hnonok, nak pama beilinya hnonok danamla. **17** Nadya nong anyek, saaboka dobnanabok, nim amba somoganesin senelamna' anasa, nadya' neyung nak wana' nauba ulunel. **18** Na nong ak dara, nadya ganya doboka or obnulum ana' orok bok dara, wera obnenggununeseng bok, nadya ganya doboka or ubnulum henesinya. Anasa, nara ganya doboka eleklesinya uboka, ono' saaboka onsok dona'anya ulumna. Ban wa nera Neyung bedya nak unu welelula' aboka elegenyok," hyok. **19** Yesus adya ban wenyaboka lebgiga balamok dara, Yahudi nang edya ono' nauba ganya bokdangoka ulumek. **20** Nimi

nauba wenyalameka' ara, "Ban wenyalalanya nera bisa' gologoka serema salalamla' anasa, hekasa ugunda alak keelum do?" aboka lelemek. **21** Bok ono' yok nang edya hnon lelemeka' ara, "Bisa' gologanggunna nang era yuba salamla' anasa, bisa' gologosonya bera henga lum nang ek henga gwelegoka hwebnamso de?" aboka lelemek. **22** Ban salek enyek, Yerusalem heikek Imik Neyung e meewoka pika bakameka' bekna' sum dangamok. An salek era saragena' li ulumok. **23** Dara, Yesus ara Imik Neyung ek Salomo bedya makoka somok e sindamak wekoka kemero yabalamok. **24** Ban sum enyek, Yahudi nang era Yesus ak aknel ganagal yeiniboka, "Anda nuk loba' nenelesilima' ara hek sum lobnesilim do?" aboka heibek. "Anasa wera, anda aldib Kristus nimi blebsina' dubnya ulumen bok dara, nara alan aldib ulumna aboka or laga poboka leblom," hyek. **25** Dara, Yesus adya sikenek lebsuka' ara, "Nara ugunuk seleb lebsisa bok, nak dib senenggulunulum. Nadya' neyung be si sibuka yoka'-yoka' lok so' unulamna' anadya, nak okoka bekna' laga lelesil. **26** Ugunda nadya pam unggululuma' adya, nak dib senenggulunulum. **27** Nadya pama yoka' ak dara, nara sikenek ella ulusinekanya, sikda nadya yuba keboka nak diriga yalanyak. **28** Nara sikenek soba' ulmorulunoka' aboka embenga' una' eleganesin dara, sikda hyak somoganggunumak. Nimi yok nim edya nadya soruk ak ab hyak bleboka dobnenggunusak. **29** Nadya' neyung bedya, sik nonga nak doboka elegenyoknya bera, yoka'-yoka' nidya' ara mek so bok, alda hyak senenggoma' imiknya ulumla' anasa, alja bo ulusila' anasa, alja soruk ak ab yoknya bedya bleboka dobnenggunusil. **30** Nab Neyung beb dara, hnonok ok ulunam," hyok. **31** Dara ono' saaboka Yahudi nang edya, Yesus ak girik adya doboka obnoba' aboka ulumek. **32** Bok ono' Yesus adya sikenek lebsuka' ara, "Nadya' neyung bek ab lanalamla' una' enyek ugun hogung ak nauba unulusina' anasa, har nyek malya unulamna' anasa girik adya obnenoba' aboka ulunulum do?" hyok. **33** Dara, Yahudi nang edya Yesus ak, "Anja pe unululam wa nenesa gom, alda an nong anyek nimi sirika' bok, nara Imik Neyung me aboka Imik Neyung ak malya nenelelama' anasa, girik adya obgenoba' aboka ulunjab," hyek. **34** Dara, Yesus adya sikenek, "Ugunja unuwanalum an yuba momnya doboka' ara, Imik Neyung adya, ugunda im

nang ululum amok, aboka momnya dobok. **35-36** Anasa, Imik Neyung yuba doboka unulumek nim ek, im nang aboka si sisuka' anasa, wera nadya Imik Neyung bedya me nera, nara an alamna dara, ugunda hekasa nak malya lelemla aboka, yana kilinulum do? Nera Imik Neyung adya orowek muna' geboka sokok an bokol yeilinyoknya ulunabok unulunulum. **37** Nadya' neyung bedya nak welelom aboka elegenyok wa nenyek unuwoka wena' orok dara, wera ugunda nak dib senenenggom mem. **38** Bok nadya dara, unuwoka welenabok, ugunja danyek nak dib senena' orok bok, nadya welemna wa nenyek keeboka dib senewolulum. Anadya wera, Neyung bera nadya nong lomok ulunelekanya, nara alja nong lomok ulumna' ara, ugunda ella danalum bar," hyok. **39** Dara, ono' saaboka Yahudi nang edya, Yesus ak salawoka heng goubnoba' aboka ul yabek bok, alda sikenek ab loboka yokok byuk. **40** Dara Yesus ara, Yohanes Pembaptis bedya nimi youma' meka dalasuka' ak, Yordan mek gemek eer sam biniboka ulumok. **41** Dara, nimi nauba Yesus ak yalamek. Wera ono' sikja dara, "Yohanes Pembaptis bera alja dara, yoka'-yoka' hnon lok so bekna' diba' ununa' orok bok, alda yub adya ok benesemba nekoka unuwanamla alamoka' ara aldib lelemok," alamek. **42** Dara, anyagan ara nimi nauba Yesus ak dib senewoka dolomek.

11:1 Betania heik nimi si Lazarus, alja weisabo si Maria geb, Marta geb, neika' ulumek. **2** Ban Maria gera, Wenelesilnya Yesus bek perob song meka yan ak ngikoka, alja hong adya lubumok gel ge ulumok. **3** Dara ban salek enyek, Lazarus bera seleb neikna' salawoka neiklemok. Dara, sik penya al hmal gelewa Maria Marta adya, Yesus ak anja nauba wana' ululamnya bera seleb neiklamla aboka yuba beiyirek. **4** Wera Yesus adya Lazarus be neiklamla an yuba kebok dara, "Ban neiklamla neikna' edya dara, somokna' damoka lanawanggunulabok, Imik Neyung si imik nenen damba ban unulamla' adya, al dam nang si imik nenewoka, ono' al neiknya Imik Neyung bedya alja me nedya si hnon imik nenewanoka' aboka ulumla," hyok. **5** Wera Yesus ara, Lazarus beb, alja hmal gelewa Maria geb, Marta geb danyek, sikenek hyak wana' nauba ulusuk. **6** Bok Yesus ara, Lazarus be neiklamla an yuba seleb kebokjok, sene mandewoka al

ulumok heikek li penya mamok. **7** Li penya maboka gwelegoka' seleb dara, Yesus alak diriga ban nang ek, "Nunda wen Yudea sokok sam ono' binimab," aboka orugusuk. **8** Bok, alak diriga ban nang edya dara, "Neklesilimnya o, eijanok Yahudi nang edya girik adya obgenoba' aboka ulunjongok sam ak anasa, anja dara or mok enyek an binob senelam de?" hyek. **9** Wenhyek bok, Yesus adya saaboka lebokja, "Li hnonok dara, dilina' ara obadya jam ulumla do? Wera anasa, ben hnon ara sokok dan dilina' ulumla' anyek, yubyek pe keeboka yabalamlala dara, wera girik oluka diknenggunumla. **10** Bok, nimi ben hnon salya' inimnek yabalamlala dara, alak dilina' unggulumla' anasa, yana girik oluka diknamla. **11** Yesus adya alak diriga ban nang ek ban seleb wenyabgogosuk dara, Wera nunja hem Lazarus bera hogunga mamla bok, gaaboka bukiyiwamanna' anasa, al ulumla' ak sam binimab," hyok. **12** Bok alak diriga ban nang edya, "Wenelesilimnya o, Lazarus bera hogunga malamlala dara, wera merewanamla," hyek. **13** Yesus adya lemoknya nera, Lazarus bera seleb somogomoknya nenesa lemok bok, alak diriga ban nang edya dara, or hogunga diba' mamla' ak lemla, senemek. **14** Anasa wera, Yesus adya sikenek laga poboka, "Lazarus bera seleb somogok. **15** Bok, nak Lazarus be ulumla' ak sam unggulumsa' adya, eiya dabnel. Wenyek dara, anadya ugunda dib senewanalum dara, pewanesila' anasa, eiya dabnel. Anasa, wen nunda alak binimab," hyok. **16** Dara, Thomas yok si nera Didimus bedya, al kabo nang ek, "Nunda alab neika' somoganamaba' anasa, or Betania sam neika' binimab," hyok. **17** Wera Yesus ara seleb Betania heikek byuk dara, Lazarus bera seleb li dombadya soko lomok mamoka' ak eiyimok. **18** Yerusalem heik ab ara, Betania heikek ban dara, mok gom, ok so hnonok jam anaso balamak. **19** Wera sikja dong be Lazarus seleb somogomoka' anasa, Yahudi nanga nauba, Maria geb, Marta geb dak, sikja ek sam nimi saleka bul yeilimeekanya, ganya hek elekgiga yeilimek. **20** Marta gera Yesus yanggal an yuba seleb kebok dara, Yesus ak men pika dil byuk. Bok Maria gera or ek ulumok. **21** Dara, Marta gedya Yesus ak, "Wenelesilimnya o, anda anyagan ulusom dara, nadya' dong Lazarus bera somoganggunusobok, anak anyagan una' orok adya seleb somogok. **22** Bok, wene salek enebabya, anja Imik Neyung ak anyek unuwalom aboka

molowamen dara, ono' unuwananggela' ara, seleb ella ulumna," hyok. **23** Dara, Yesus adya Marta gek, "Anja dong bera embenga' subnamla anya", hyok. **24** Dara, Marta gedya leboknya nera, "Sidya' daknamla sum, nim embenga' bukiyiwanasil sum, albabya embenga' suboka buknamla' ara, nara seleb ella ulumna," hyok. **25** Dara Yesus adya, "Nara nim embenga' bukullilisinya uboka, nim embenga' nenelesinya ulumna' anasa, heknedyak nak dib senewoka dolonelnya bera, seleb somogamlya' anaba embenga' bukiyiwanamna. **26** Dara, heknedyak embenga' uboka nak dib senelenelnya bera, eimik era hyak dib somoganggunumla. Nera anda ella uboka dib senelam de?" hyok. **27** Dara, Marta gedya Yesus ak, "Wenelesilimnya o, nera nara dib senelamna. Anda aldib Imik Neyung bedya me ululamakanya, nimi blebsina' dubnya Kristus eimik sokok yanamla wenyameknya bera alan dib nong ululam," hyok. **28** Marta gedya Yesus ak ban seleb wenyabgogomok dara, saaboka bindiwoka Maria gek gelelenga lebenggemok, "Nimi neklesilnya bera anyagan seleb yalakanya, anak youlul aboka youbonggel," hyok. **29** Anasa, Maria gera Yesus ara seleb nuk yal an yuba kebok dara, men sekoka Yesus ak berra byuk. **30** Ban salek era, Yesus ara Betania heik nongok ara, anam wekel yanggumok bok, heik berem Marta genya yuba salareka' ak sam anam ulumok. **31** Dara, Lazarus somogomoka' anasa, Yahudi nang nauba nimi saleka bukoka, engeb arawoka ul yeilimek nim edya dara, Maria genyek berra sekoka byuka' eiyimek dara, alda nimi dilina' ak engel balamla senewoka, sikda alak eimik dobol bilimek. **32** Maria gera seleb Yesus ulumoka' ak sam bilimok dara, Yesus yan damak koma lumugoka lebokja, "Wenelesilimnya o, anak anyagan ulusom dara, nadya' dong bera somoganggunusobok, wera anak orok adya seleb somogok," hyok. **33** Wera, Maria gera engel yabok dara, Yahudi nim eneba engel yabeka' anyek, Yesus ara eiyimok dara, Yesus anaba ganya gololong aboka umok. **34** Dara, Yesus adya ganya angwei senewoka sikenek lebsuka' ara, "Lazarus bera har sam diblum do?" aboka heibsuk. Dara sikja, "Wenelesilimnya o, banasam dibuba' anasa, anyagan uboka kemel yalom," hyek. **35** Dara, Yesus anaba engena' salamok. **36** Yahudi nang edya, "Kendululum, Lazarus bek alda wana' nauba ulumla' ara alan," hyek. **37**

Bok ono' yok nim edya dara, "Henga lum ulumla nang era hweleledyok dara, Lazarus bek ara somokna' loblula' aboka yoka' unumso do?" hyek.

38 Dara, Yesus ara ono' angwei senewoka, ganya nonga obdangoka, Lazarus be diyimek oulyang ak bilimok. Lazarus bera selenga' ak girik adya denewoka diyimek. **39** Yesus adya, "Diblum girik era demegolulum," hyok. Dara, Lazarus somogomoknya alja weis Maria gedya, Yesus ak, "Wenelesilimnya o, dibub salek era li dombadya maboka' anasa, songa lelemla bar," hyok. **40** Wera, Yesus adya Maria gek, "Nara anak seleb wenyanggena' ara, anda nak dib senewananelem dara, Imik Neyung adya' lok so' senenggoma' unuwamla' ara eibnelam, wenyamna do?" hyok. **41** Dara, Lazarus diyimek girika jaboka laga beiyimek dara, Yesus adya imik keeb weininggoka, "Imik Neyung ak, anda nadya molona' kebnelema' anasa, perob aboka gibgen. **42** Nadya molona' soba' kelenelema' ara, seleb ella ulunadyok, anyagan nimi nauba ulumaknya nenesa, anja anyagan yoka' unuwamena' anyek eiyiboka, nak alda aldib Imik Neyung adya sokok bokol yeilimoknya dib senewananoka' aboka, or mololenggen," hyok. **43** Ban nen seleb wenyabgogomok dara, Yesus adya Lazarus soko lokomeknya bek, "Lazarus o, wera anda goboka yabalom," aboka bii aboka lelemok. **44** Dara, seleb somogomoknya Lazarus bera embenga' suboka lanabok. Alja hogung ab, nonga nidya', somogamna nimi waaboka dililimek boksom edya wamamek bok, suboka lanabok. Dara, Yesus adya, "Boksoma nidya' gwiriwomun dara, alda or yabalul," hyok. **45** Dara, Yahudi nimi nauba Maria gek nimi saleka bukoka ul yeilimek nim edya, Yesus adya ban unuwoka Lazarus bek embenga' suboka bukiyiwoka' ak eibek dara, alak dib senewoka domek. **46** Bok ono' Yahudi nimi darasam nim edya dara, Parisi nang ek Yesus adya unuwal aboka bo nekel bilimek. **47** Dara, Parisi nang eb, sikja Imik Neyung yuba wa gaka' dub nang eb adya, yuba sabnoba' aboka, mok soko dam nang ak molowoka, sikda nidya' eb bolobdangoka longowoka Yesus ara yoka'-yoka' hyak nauba lok so' ara bekna' diba' unulamla' anasa, nunda heka' hubnemab do aboka yuba salamek. **48** Nunda alak or unululul senewoka eil lolomeibya dara, nimi nidya' alak dib senewoka, ono' eimik era, Roma nang edya, nunja un mok soko alawanasaka' ak, alak eil

lolomab aboka yuba salamek. **49** Ban salek, Yahudi nang yuba wa gaka' dubnya si Kayafas bedya, Yahudi nang ek lebokja, "Ugunda hyak elgom nang ululum. **50** Nunja soko malya uboka soldowoka denghelyek anasa, nenesa leboka nimi hnonok ara nimi nidya' amba lunuwoka somokna dara, ugunja dara, perob dolul senenggululum de?" hyok. **51** Nera Kayafas bedya ok ganya seiniwoka lebnenggumok. Alda ban salek yuba wa gaka' dubnya ulumok bok adya, eimik Yesus ara sikja soko amba somoganamoka' anasa, orowek ununumna' diba' men lemok. **52** Ban somoganamoknya nera, sik Yahudi nim emba ok lebnenggumok bok, nidya' Imik Neyung mabo bokgogoka ulumek nim enyek, bolowoka neika' ak nenesosulula' aboka somoganamoknya nenesa, ununumna' diba' lemok. **53** Dara, sum enyek aba' moruwoka, eiyiboka Yahudi dub nang edya, Yesus ak obnoba' aboka dulumek. **54** Anasa, Yesus ara Yahudi nang gangganek nimi hnom uru yabana' loboka, alda Yudea sokok loboka, hola' sekna' orok sokok berem Efraim heikek biniboka, alak diriga ban nang eb neika' ulumek. **55** Ban salek enyek, Yahudi nang edya perob sum era oka yenemoka' anasa, nimi nauba Yerusalem heikek biniboka, sikja nimiguma' mek elekdanoba' aboka, sikja heikek aba' ara balamek. **56** Dara, Yesus ara yalamla anya' senewoka, Imik Neyung e eremek sekoka, kemero yabalameekanya, sik moumen anaba, "Wei, ugunda heka' senelelum do? Nunja perob sum oka dal bok, Yesus anaba yanggunumla do?" aboka heibdangdo yabalamek. **57** Dara, al neik salek enyek, Parisi nang eb, yuba wa gaka' dub nang eb, yok nim ek ugunda Yesus ak eibmun dara, salawoka henga goubnemaba' anasa, wera an ulumla aboka nuk nekel yanasulum aboka, wenyab girigemek.

12:1 Yahudi nim edya perob sum era li lambadya anam gweleganamla aboka ubek bok, Lazarus embenga' suboka bukiyimoknya bedya heikek, Yesus ara yeilimok. **2** Dara, anyagan Yesus amba masa youmek. Marta gera dena' boklomookanya, Lazarus bera Yesus ab neikik bukoka delerek. **3** Ban salek enyek, Maria gedya hyak perob gen-gen songa ngikildan meka doboka, Yesus alja yan sang ak ngikemookanya, ono' alja hong adya lubumok dara, sikja e nera neik mek song ok gee alamok. **4** Bok, Yesus ab

neika' yuba doro diriga bannya si Yudas Iskariot bera eimik era, Yesus ak oblulum aboka yuba dil binimoknya bedya lebokja, **5** "Hekasa ban perob song mek era, yok nim ek rupiah dekoka, dobsibya rupiah era bona' garan ulumak nim ek eleganggunusibya do? Gibna' hnonok wa weboka dolomak rupiah eneso danamso bok," hyok. **6** Yudas bedya wenhyoknya nera, alja bona' garan nim enyek, wana' uboka elegosununa' aboka lebnenggumok. Alda Yesus yuba doro diriga ban nanga rupiah beilina' ara alja bo uboka, hnon hoka' doboka delemoknya nenesa lemok. **7** Bok Yesus adya dara, "Nak oboka sokok loknenija sum enesa, bekna' diba' or nak unuwoulul bar, wenyanggom loblulum. **8** Wera, bona' garan nim ek dara, ugun gangganek soba' ulumnemak bok, nak dara, ugunub soba' neika' unggulumnemaba' anasa, or unululul," hyok. **9** Yahudi nang nauba adya, Yesus ara, wera Betania heik ulumla an yuba kemek dara, Yesus amba ok gom, aladya Lazarus embenga' suboka bukiyimoknya benesa hnon kendenoba' aboka bilimek. **10-11** Dara, alak embenga' sumoknya nenesa leboka, nimi nauba ara Yahudi nang yuba loboka, Yesus ak nauba dib senewoka yalameka' anasa, Yahudi Imik Neyung yuba wa gaka' dub nang edya, Yesus ab Lazarus beneba, nidya' neika' obnesab aboka, yuba salamek. Yuba **12** Yesus ara ampum so maboka gwelegok dara, nimi nauba Yahudi nim edya' perob sum anasa, yeilimek nim edya, Yesus ara heikek younuna' aboka wera pikek yanggal ana' kemek dara, **13** wera sikda nimi nauba yogul mekla' lebsalawoka Yesus ak eiya hlaboka pika dil biniboka alak giboka wenyalamek, "Hosana! Wenelesilnya si amba yoknya, alak peroba' dangalalul! Israeli nimi dubnya bek peroba' dangalalul!" wenyaboka lelemek. **14** Dara, youma' ununumna' lelemek nang edya, al yanamla aboka momnya dobek yub enyek, gigiwoulul aboka, Yesus ara nim abaklesil pam, mek goubenya pam enyek, eiyimok dara, bukoka balamok. **15** Momnya dobek yub era an: "Wei, Sion heik nim o, ugunda lok ganya bonggom mem. Wera kendululum, anja dubnya bera mek goubenya keledai pam dubuk bukoka yanggal," alamek. **16** Yesus adya alak diriga ban nang era, anam salek era, ella danggumek bok, Yesus anyek seleb imik nenewok danyek, Imik Neyung yuba youma' momnya domeka' ara alsamba leboka' ak an, wen unulumek senewoka seinimek. **17** Ono', Yesus

adya Lazarus bek goboka yalom amookanya, suboka embenga' bukiyimoka' ak nauba longowoka eiyimek nim edya dara, Yerusalem heikek alsamba nekoka yuba lero yabalamek. **18** Yoka'-yoka' lok so' bekna' diba' unululanya bera yalamla an yuba kemek dara, nimi nauba Yesus ak pika dibgiga el bilimek. **19** Dara, Parisi nang edya sik moumen, "Wera ugunda yoka' unuldalaluma' ara kendululum. Nimi soko nimi nidya' ara alak wekel yalamaka' ara eillililum," aldalamek. **20** Dara, Yerusalem heik Yahudi nim edya perob sum anasa, yuba longowanamab aboka balamek sum enyek, Yunani nimi hnon neika' makoka bilimek. **21** Dara, sikda Betsaida heikek Galilea sokok abnya Pilipus bek biniboka, "Neyung o, or senemen dara, nunda Yesus ab eibdeisibya senemaba' anasa yeilimab," hyek. **22** Dara wera, Pilipus bedya Andreas bek yuba bo bilimok dara, sikda neika' Yesus ak wenyal bilirek. **23** Dara Yesus hnon lebok, "Wera, nimi diba' me nak imik nenewanamak salek ara seleb oka dal. **24** Nara ugunuk dib lebsin, gandum dok okoka sokok malyingginiboka blona' orok dara, wera doka hnon ulmoublumnamsok bok, soko lomok bloblya dara, yok doka nauba mengewoka gong liklamla. **25** Heknedya alja nong una' ek wana' nauba uldalamlala dara, eimik alja nong una' weiningdowanamlala. Bok, heknedya meneng nong ek sokok an wana' uldanggulumlala dara, eimik alak bo beiyiboka pe ulmoublemnamla. **26** Heknedya nak aralanelnya bera, or nak diriga yeiniboka, na ulumnya' ak anaba, alba anyagan ulumnamla. Nak arawoka welelanya bera, nadya' neyung bedya gigiwanamlala. **27** Wenera nadya ganya soldob menegoka ubnela' anasa, wera heka' ak lebnamna do? Neyung o, nak wene salek or blebnelom henemna de? Orok, al nenesa unuwonuna' aboka yeilimsa," hyok. **28** Dara, Yesus ono' molowoka' ara, "Neyung, anja si nek imik nenelelom," hyok. Dara, imik ab yuba hnon doblinggoka lebokja, "Youma' hnon seleb imik nenewasebok, ono' hnon saaboka imik nenewanamna," hyok. **29** Yok nimi nauba anyagan seklemek nim edya dara, hnonda, "Liming gururu amla," alamek. Hnon yok nim edya dara, "Lero enedyala yuba salamlala," alamek. **30** Yesus adya sikenek, "Yala' keblumnya nera, nasamba ubnenggublabok, nera ugunsamba leboka ubla. **31** Wera, sokok an yana lelewanamlala salek era, seleb yala' anasa, sikja dubnya bera

eleboka boboganamla. **32** Bok nak dara, sokok anyek dara, imik nenewanelya dara, nimi nak gliboka eboka bo yanamna," hyok. **33** Nera Yesus anyek heka' huboka somoganamna ella ulumoknya nenesa, sene orowek lel gogolomok. **34** Dara nimi nauba longomek nim edya Yesus ak lebekja, "Nunda Musa bedya unuwanalum an yuba kemouba' ara, nimi blebsina' dubnya Kristus bera sob-soba' ulmoublemnamla wenhyoka' ella ulumab bok anasa, nimi diba' me nek eimik imik nenewanamla alamla dara, nimi diba' me nera heknyek lelelam do?" hyek. **35** Dara, Yesus adya sikenek, "Mek anam ok dilina' ara ugun gangganek ulumnamlam. Anasa, guna' adya ugunuk anam siklewanggusil salek, dilina' or ulumla wenyek, or yabalalulum. Heknedya guna' ak or anam yabalealanya bera, pik okoka binimna' ara elgom ulumla. **36** Ugunda dilina' mabo danalum aboka, dilina' ugun gangganek anam ulumla salek enyek, dilina' ak dib senewoululum," hyok. Yesus ara wenyabgogomoka' seleb dara, sik gangganek loboka, yokok sam doknol bilimok. **37** Yesus adya nimi hogung ak yoka'-yoka' hyak lok so' unulumok bok, sikda alak dib senenggulumek. **38** Yahudi nim edya Yesus ak dib senenggulumeka' damok era, Imik Neyung yub orowek ununumna' lelemoknya Yesaya bedya momnya doboka' anyek gigiwolula' aboka, unumek. Momnya domok yub era, "Wenelesilimnya o, nunja lelemab yub era, heknedy dib senemla do? Hnon Imik Neyung migib ara heknyek laga amamla do?" aboka dobok. **39** Yesaya bedya ununumna' lelemok sok anasa, Yahudi nim edya Yesus ak dib senenggulumek. Yesaya yokok sam lemok ara ban: **40** "Dara, heng adya pe eibijek, ganya adya pe seiniweijek aboka, Imik Neyung adya sikja henga luma neneiyisuk, ono' ganya su kiyiwousuk. Sikda pe eiyiboka pe seiniwoka ganya dangaweijekanya, meiriyiweisinyek aboka umsa," alamla. **41** Yesus ak imik nenemoka' anyek eiyiboka, Yesaya ara Yesus amba yuba lelemookanya, ban nidya' ara men lelemok. **42** Bok, Yahudi dub nang edya, nimi nauba darasam Yesus ak dib senewoka dolomek. Bok, Parisi nang edya, Yahudi nang Imik Neyung gibna' ek wekna' mem hisijek aboka, lok anasa, Yesus ak dib senelemab ana' ara doknowoka lolomek. **43** Ban unulumeka' damok ara, Imik Neyung adya nuk perob senesin danagom, nim adya danyek nauba gigilesinok senewoka ulumek. **44** Dara, ono'

Yesus adya laga sekoka bii aboka, "Heknedya nak dib senelenel dara, alda nak ok dib senenggulunel bok, nak sokok bokol yeilinyoknya bek dib senelamla. **45** Wera anasa, heknedyak nak heng eilinel dara, alda seleb nak bokol yeilinyoknya bek eillilamla. **46** Nak dib senelenija nim era, guna' lomok ulumeijek aboka, nara imik aba' ara sokok an dilina'anya yeilimsa. **47** Nara sokok an yana lelelesununa' aboka yanggumsa, soko nimi blebsununa' aboka yeilimsa' anasa, nimi ben hnon heknedyak nadya yuba keleladyok pe ununggulumla dara, nara alak yana lelewanggunumna. **48** Heknedya nak lek senewoka lolonelekanya, nadya yub ek dib dona' lolomla dara, alak yana lelewanalanya bera seleb orowek ulumla. Nera nadya lemsa yub edya sidya' daknamla sum eimik alak yana lelewanamla. **49** Yuba lelemna' ara, nadya ok ganya seiniwoka lenggulumna. Bok neyung be na sokok bokol yeilinyoknya bedya, anyek wenyhenelam aboka orugonyoka' anyek lelesin. **50** Imik Neyung bedya oruklesila' ara, embenga' una' eleklesila' ara, nara ella ulumna. Anasa, heka' ak nadya lelemna' ara, neyung bedya anyek leb elegeisilom alamla' anyek ok lelemna," hyok.

13:1 Paskah sum era ampum so dok dara, Yesus ban sokok anara loboka, alja' neyung bek binimok salek era oka doka' ara ella ubok. Sokok an alja yuba dolomek nim ek soba' wana' ulusuk sok, ono' sirika' daknamok sum eneba wana' ubsuk. **2** Yesus ab, alja yuba don nang eb, inimoka' anasa delemek. Iblis adya, Simon bedya me Yudas Iskariot bek, Yesus bek yuba dil bulula' aboka, ganyek seleb orugomok. **3** Yesus ara, neyung bedya nidya' yok-yok migib unulamla' ara, nak seleb elegenyookanya, Imik Neyung ak ab yeilimsa' ara, ono' saaboka Imik Neyung ak binimna senewoka ella umok. **4** Dara, Yesus debdakok dara, alda sekoka eilibik akleng gwiriwoka, mek lubna' akleng adya der pik wegebdangamok. **5** Ban seleb dara, solowak lomok meka yekoka alja yuba dorodiriga ban nanga yana mek elek einisuukanya, derek norobdangamok mek lubna' edya alja yuba don nanga yana gebesuk. **6** Dara alda, Simon Petrus bek elekdo yabok dara, Petrus bedya alak, "Wenelesilimnya o, anda nadya yana mek eleganenelem do?" hyok. **7** Yesus adya, "Nara unulusina' ara, wen elgom

ululam bok, eimik era amba ella danalam," hyok. **8** Petrus bedya dara, "Anda nadya yan era meka' mek eleganggununelem," hyok. Yesus adya alak ok, "Anak nadya mek eleganggununggisinya dara, nablaboka neika' unggulumnesinim," hyok. **9** Dara, Simon Petrus bedya, "Wenelesilimnya o, wera anaso dara, nadya yan ok gom bok, nadya huka nonga nidya' mek eleganenelem," hyok. **10** Yesus adya saaboka, "Seleb meka hwilenya bek dara, alja yan ok mek eleganamso, alja nong seleb pelemla. Dara, ugunda pesil bok, nidya' pewanggusil," hyok. **11** Yesus ara ban benedya yuba dil bininel senewoka ella ulumoka' anasa, ugunda nidya' ara pe unggululum, hyok. **12** Sikenek yana seleb mek elegesuk dara, Yesus akleng ongowoka bul yibilimookanya wenyhusuk, "Ugunuk ubsin ara anyek ubla senewoka damok ara ella ululum gom, orok gom? **13** Ugunda nak Neklesilimnya, Wenelesilimnya, alanuluma' ara, al unu ulumna' anasa, dib lelenulum. **14** Dara, nara ugunja neklesinya wenelesinya dangoka ulumnakanya, ugunuk yana mek elegeisin dara, wera ugumbabya yana mek elegeldalamnasom. **15** Nara ugunuk ubsin sok, ugumbabya unuldalamnalum aboka, bekna' diba' ara an elegeisin. **16** Wa welelanya bera, eili be diba' ak imik so danggunumso. Bokol bilimoknya bera, alak bokol bilimoknya bek imik so danggunumso, hena' ara, ugunuk dib lebsin. **17** Ban ella domunukanya, wera unulumnalum dara, pe ulumnalum. **18** Ugunuk nidya' lenggulusin. Nadya benyek aboka dosenya bera orowek ella ulumna. Bok, Imik Neyung yuba momnya doboka' ara, nablaboka neika' delenamnya bedya isa' gebnel, amok yub anyek, gigiwolula' aboka ubnamla. **19** Ban unuwalya dara, ugunda nak alda alan, dib senewoluluma' aboka, ban nen anam unuwanggom bok, wen orowek ugunuk neksin. **20** Ugunuk wenyhesinya nera dib nonga' lebsin, heknedya nadya boklenanya bek doboka dililamla dara, alda nak doru dililenel. Heknedya nak doru dililenel dara, alda nak bokol yeilinyoknya bek doru dililamla," hyok. **21** Yesus ban wenyabgogomoka' seleb dara, ganya ya weboka, sikenek wenyhusuk, "Nimi ben hnon ugun gangganek ab, nak yuba dil bininel wenyasinya nera, dib lemna," hyok. **22** Dara, alja yuba doru diriga ban nang era, keebdangdo balameekanya, heknyek lemna do senewoka ganya esuk. **23** Yuba domoknya Yesus adya wana' nauba ulumoknya hnon, Yesus berem

buklingnemok. **24** Anasa, Simon Petrus bedya heknyemba lemla do senewoka heibya aboka alak soruk okomok. **25** Dara, alda Yesus ak lingnewoka, "Wenelesilimnya o, heknya emba lelam do?" aboka heibok. **26** Dara Yesus adya, "Gwaneng doboka mek hmeiya ek doronggoka soboka eleganenya bera alan," hyok. Dara, gwanenga mek hmeiya ek soboka, Simon Iskariot bedya me Yudas bek elegemok. **27** Dara, Yudas bera ban gwanenga dol yabok sab-sab enyek, Satan bisa' ara alja' ganya lomok wekel yeilimok. Dara, Yesus adya, "Or anja unuwonun senemennya nera, berra unul yabalom," hyok. **28** Yok nang nidya' bukoka delemek nang era, Yesus ara hekasa alak anaso lemla do senewoka ganya ella danggumek. **29** Yudas bera, sikja rupiah beilinya ulumoka' anasa, hnon nang edya dara, Yesus adya sik delemeka' amba dena' hnon dekel bilom aboka orugamla gom, bona' orok nim ek rupiah hnon egeleg bilom aboka orugamla gom, senemek. **30** Dara, Yudas bera, seleb gwanenga dobok sab-sab goboka byuk. Dara, seleb inimok. **31** Yudas be seleb bilimok dara, Yesus ara, "Wenyok nimi diba' me nek imik nenewanamlakanya, Imik Neyung ak, nimi diba' me pik moruwoka imik nenewanamla. **32** Dara, Imik Neyung ak Yesus pik moruwoka imik nenewanamla dara, Imik Neyung lomok al damnya ono' alja me nek imik nenewanamla. **33** Najabo yab o, nara ugunub anyagan sidya' neika' ura dakdowanamab. Ugunda nak elemnenulum bok, Yahudi nang ek lemsa sok, wen ugunuk wenyhesin, nak binya ak ara ugunda yamenggom. **34** Wenyok unulumnulum yub ugunuk elegeisin: Ugunuk nadya wana' ulusisa sok, ugumbabya wana' uldalamnalum. **35** Ugunda wana' uldalamun dara, nimi nidya' adya Yesus yuba doru diriga ban nang aboka, ella ubnesak," hyok. **36** Simon Petrus bedya, "Wenelesilimnya o, anda hekmok binilam do?" aboka heibok. Yesus alak leboka' ara, "Na binimna' ak ara wen anda dobol yanggununelem bok, eimik ek dobol yananelem," hyok. **37** Petrus hnon heibok, "Wenelesilimnya o, hekasa wen anak dobol yanggununggisinya do? Nara hyak ansamba leboka somoganesinya," hyok. **38** Dara, Yesus alak leboka' ara, "Aldib, anda nasamba leboka dib nong somoganesom de? Nara anak hyak dib lebgen, Wining yuba anam ngoubnenggulyebok, anda nak liga winilya bobnenewoka, naba elgomnya henenelem," hyok.

14:1 "Ugunda ganya mounduk-mounduk anggom. Imik Neyung ak dib senewomunukanya, ono' nak hnon dib senewonululum. **2** Nadya' neyung bedya' heikek ara, e nauba ulumla. Anaso unggulumso dara, ugunuk wenyhenggunusisinya. Ugunsamba e sobnesina' anasa, binimna. **3** Dara, nara biniboka ugunsamba e seleb sobgogowaisinya dara, na ulumna' ak sam ugumba ulululuma' aboka, nara saaboka el yeisinyekanya, na ulumna' ak bo binisin. **4** Na binimna pik era ugunda ella ululum," hyok. **5** Thomas bedya saaboka, "Wenelesilimnya o, an binilama' ak ara, nunda elgom ulumaba' anasa, heka' huboka pik era ella danasibya do?" hyok. **6** Yesus alak, "Nak dara, pik ab, dib yub ab, embenga' una' ab, ulumna. Nim ara nak pik orok dara, Neyung bek yangguneseng. **7** Ugunda nak ella ulunusom dara, wera, Neyung bek ella ulumnesom. Dara wera, ugunda alak ella ululumukanya, alak seleb eiyilum," hyok. **8** Pilipus bedya, "Wenelesilimnya o, ban Neyung bera nuk aaweisilom. Dara, anadya seleb senewanob bar," hyok. **9** Yesus adya alak, "Pilipus o, nara ugunub soba' neika' ulumab bok anasa, anda nak anam elgom ulunelem de? Heknedya nak eibnelya dara, wera Neyung bek seleb eiyiledya. Anasa, hekasa Neyung bek aaweisilom alalam do? **10** Nara Neyung bedya ganya lomok ulumnakanya, Neyung bera nadya' ganya lomok ulunela' ara dib senenggulunulum de? Nidya' ugunuk lelesina' ara nadya ok salya' lenggulunabok, Neyung bedya nadya ganya ak sekoka, alja wa welemla. **11** Nara Neyung bedya ganya ak ulumnakanya, Neyung bera nadya' ganya ak ulunel wenyalamna' ara, dib senewolulum. Oroka' anababya, nadya welemna wa nyenyek sunuwoka dib senewolulum," hyok. **12** "Heknedya nak dib senewanenel dara, nadya welemla wa nera, alba unuru welemnamla. Dara, nara Neyung bek binimna' anasa, alda nauba so welemnamla asina' ara, dib lemna. **13** Neyung bek, me adya imik nenewolula' aboka, ugunja or heka' ok do nadya si sibuka mololonumun dara, unulumnesin. **14** Ugunda yoka'-yoka' nidya' nadya si sibuka mololonumun dara, unulumnesin," hyok. **15** "Ugunda nak wana' ulunumun dara, nadya oruklesin yub ek sunuwoka unulumnulum," hyok. **16** "Nadya' neyung bek molowanya dara, ugunuk yok arasinya eleganesil. Ugunublaboka soba' ulululuma' aboka, ban aralemnesilnya bera dib yub

ulumla Geisinya ek eleganesil. **17** Soko adya, alak eilinggulumlakanya, elgom ulumla' anasa, alak dobnenggunumso. Bok, alda ugunublaboka ululumukanya, ono' ugunja ganya lomok ulumnesila' anasa, ugunja alak ella ululum. **18** Nara ugunuk okna mabo gekneba' lobinggunusin. Ono' nara ugunuk samal yanasin. **19** Mek anam binimna' anasa, soko adya nak eibnenggununel bok, ugunda nak eillilimnenulum. Nab embenga' ulumna' anasa, ugumbabya embenga' ulumnulum. **20** Ban sum enyek, nara Neyung bedya' nong lomok uboka, ugunda nadya' nong lomok uboka, nara ugun lomok ulumnesina' ara, ban sum enyek ella danalum," hyok. **21** "Heknedya nadya oruklesin yub ek salawoka unululanya bera, nak wana' ulunelnya bera alan. Dara, nak wana' ulunelnya bek, nadya' neyung bedya alak wana' ulumnamlakanya, nababya alak wana' uboka nadya nong alak aawanamna," hyok. **22** Dara, Yudas Iskariot gom, yok Yudas bedya Yesus ak, "Wenelesilimnya o, hekasa an nong ak dara, nuk aawanesilimjok, sokok ak dara, hekasa aawanggunulam do?" aboka heibok. **23** Yesus adya dara, "Ben hnon nak wana' ulunelya dara, alda nadya neklesin yuba sunuwoka ulumnaml. Dara, nadya' neyung bedya alak wana' ulumnamlakanya, Neyung beb, nab alak yeinima dara, alab neika' ulumnamb. **24** Nak wana' unggulunelnya bera, nadya neklesin yuba sunuwoka unggulumla. Nadya neklesina' kelum yub era, narinya gom, na bokol yeilinyoknya bedya yub ek neklesin," hyok. **25** "Ban nidya' ara, nab neika' umab salek ok lebsin bok, **26** arasinya bera, Neyung bedya nadya si pik uboka bokol yanasil Geisinya edya, yoka'-yoka' nidya' ugunuk neklemnesilikanya, nara ugunuk lesisa yuba nidya' bekillilimnesil. **27** Ganya daboka una' ara ugunuk lobonggo binisin. Narinya nyek ugunuk elegoka lo binisin. Sokok anyeb eleklesilnya neneso' ak eleganggunusin. Anasa, ugunda mounduk-mounduk aboka lok ganya bonggom," hyok. **28** "Nara binyekanya, ono' ugunuk saaboka yanasin amna' ara, seleb kelum. Dara, nak wana' ulunesom dara, nara meknya Neyung bera senenggomnya anasa, nara Neyung bek bininanya nyek, ugunda eiya dabnesuso. **29** Unuwalya sum era, ugunda dib senewoluluma' aboka, anam unuwanggublabok, ugunuk orowek lebsin. **30** Sokok an dubnya bera, yanggan sum oka dala' anasa, nara ugunublaboka nauba sabdanggunumab. Alda nablakonya goma'. **31** Bok,

sokok an ara, Neyung bek wana' ulumnakanya, Neyung bedya orugunyoknya nok unulamna' ara, ella danaseng. Anasa wera, nunda anyaganyeba' ara binimab," hyok.

15:1 "Nara dib nong gal nong ulumnakanya, nadya' neyung bera pe yeboka memena'anya ulumla. **2** Nak doka mounggulumla soruka nidya' diblamlakanya, nidya' molulanya nera, nauba dangoka soba' moubgiga balalula' aboka, ono' gereboka lelekdeboka memelamla. **3** Nara ugunuk seleb elegeisisa yub edya, ugunda anaso seleb pewousuk. **4** Ugunda nablalaboka kwebdangoka ulumnamab dara, nara ugunub kwebdangoka ulumnamab. Gal soruk ara albeyok doka moubnenggunumso bok, gal nong ok ulumso dara, moubnamso. Anasanya neikik, ugunda nablalaboka kwebdangoka unggulumnesibya dara, doka mounggulumnusom. **5** Nara gal nong ulumna. Ugunda, gal soruk ululum. Heknedya nak ulumnenelekanya, nara alak ulumnamna dara, alda doka nauba moulumnamla. Bok, na orok dara, ugunda yoka'-yoka' pe unuwanggunusom. **6** Heknedya nablalaboka kwebdangoka unggulumnam dara, gal soruka diboka bobogamna ek mekemna' anaso ulumla. Ban anaso soruk ara, neika' ak mamagoka uka dalamak dara, uka delemla. **7** Ugunda nablalaboka kwebdangoka ulumeibyekanya, nadya lelesin yub era, ugunja ganya lomok sam ulusilya dara, ugunda yoka'-yoka' dobsibya seneleluma' anyek, elegeisilom aboka mololomun dara, ugunuk eleganesil. **8** Ugunda doka nauba molumnesil dara, nadya' neyung bedya si imik nenewoka, ugunda nadya yuba doru diriga ban nang diba' ulumnulum," hyok. **9** "Neyung bedya nak wana' ulunyok sok, nadya ugunuk wana' ulusisa. Anasa, nadya wana' ulusisa nang gekneba' ulululum. **10** Nadya' neyung bedya orugenyok yub keboka unulamsakanya, alja wana' una' ak ulumna sok, ugumbabya nadya oruklesin yuba keboka unulumun dara, ugunda nadya wana' un ak ulumnulum. **11** Nadya ei-ei ganya ara ugunja ganya ek ulumnesilikanya, ugunja ei-ei ganya bololuma' ara deknelesulula' aboka, ban nidya' ara ugunuk lebsin. **12** Ban oruklesin: Nara ugunuk wana' ulusin sok, ugumba wana' uldalamnalum aboka orugeisin. **13** Nimi ben hnon ara, alja hem bema alja nonga somogonun senelelanya bera, alja wana' una'

ara hyak nauba so ulumla. **14** Ugunda nadya oruklesin yub enyek, keboka unulumnulum dara, ugunda nadya hemyab ulumnulum," hyok. **15** "Wa wenya bera alja neyung bedya unulamla' ara elgom ulumla' anasa, wene salek eba' ara, eimik ugunuk wa wen nang wenyhenggunusin. Bok, ono' saaboka nadya' neyung bek ab kemsa yub ugunuk nidya' laga lemsa' anasa, ugunuk nadya hemyab alamnesin. **16** Ugunda nak dobnenggunulum bok, nadya ugunuk weboka dosisa. Ugunda bindiwoka, soba' ulmorulumnamla doka moulusulula' aboka, dosisa. Dara, nadya si sibuka, neyung bek ab yoka'-yoka' nidya' elegesilom aboka mololomun dara, eleganesil. **17** Ugun dam nang wana' uldalalulum aboka orugeisin," hyok. **18** "Sokok an yoka' nang edya ugunuk lek senewanasil dara, nababya men lek senelenyeka' ara, seiniwoka beklemnelum. **19** Ugunda sokok anyeba' ak ulusom dara, aljinya nek anasa, wana' nauba ulumnesuso bok, ugunda sokok anyebnya unggululuma' anasa, nadya sokok ab ugunuk dosisa' anasa, ugunuk lek senelesil. **20** Wa wenanya bera, alja neyung bek ab imik so unggulumla seleb wenyamsa' ara, beklulum. Dara, sikda nak olonyek dara, ugumba olomnesak. Sikda nadya yuba kelenyek dara, ugumba ugunja yuba kelemnesak. **21** Bok, sikda nak bokol yeilinyoknya bek elgom ulumaka' anasa, nadya si nempa leboka, ban yoka'-yoka' ugunuk unulumnasak. **22** Nak yanggusinyekanya, ban sikenek wenyana' orok dara, malya una' sikenek unggulumnususo bok, wenyek dara, sikja malya una' orok senen lebngguneseng. **23** Nak lek senelelanya bera, nadya' neyung bek anaba lek senelamla. **24** Yok nim edya hyak ununggulusengnya nek, sik gangganek ununggulusinya dara, sikja malya una' unggulusususo bok, wenera, nadya unulamna' eillilimak bok, nak lek senelenyaakanya, neyung beneba lek senelemak. **25** Bok, unuwanalum an yuba sikja bukuk momnya doboka' ara, dib gigiwolula' aboka umoka' damok ara, anya' senewal henggonggom bok, nak lek senelenyek. **26** Bok, arasinya neyung bek ab, bokol yanasinya bera, neyung bek ab lanawoka dib yub lelelanya Geisinya bera, yeiniboka, alda nasamba leboka laga neklemnesil. **27** Dara, ugumbabya hnon, nara ugunublaboka youma' ek moruwoka neika' ulumouba' anasa, nasamba leboka laga neklemnenulum," hyok.

16:1 "Ban nidya' wenyalasin ara, ugunda solom ganya boboka lobmunuk aboka lelesin. **2** Ugunuk Imik Neyung ek sam aba' ara, yaklemnasak. Dara, ono' hnon, sik unulusija nim edya dara, Imik Neyung amba nunda pe giboka unulumab senelemeija salek era, yanamla. **3** Ban unuwanasaka' ara, sikda neyung beb nab elgom ulusaka' adya, ugunuk eimik unulumnasak. **4** Eimik ubnamla sum era, al orowek nekesuka' ara, seiniwanalum aboka, ban lebsin. Men salek era, nara ugunuk neika' ulumouba' anasa, ban yuba neknenggusisa. **5** Nara wen na sokok bilom aboka bokol yeilinyoknya bek binimna. Bok, ugun gangganek ab ben hnonja, Anda hekmok balalam do aboka heibnenggunulum. **6** Bok, ban nyek ugunuk seleb lebsin adya, ugunja ganya engewoka soloma dabsil. **7** Anasa, ban nidya' nadya ugunuk, na imik heik binimna, ugunsamba perob dosulul amna' ara, dib lebsin. Nak bana' orok dara, arasinya bera ugunuk yanggunumso' anasa, nak binya dara, wera alda ugunuk bokol yanasin. **8** Wera, Geisinya ben yalya dara, soko nim edya malya una' ek hnon, pe una' ak hnon, yana lelesina' ak hnon, sikja seinilimaka' anyek, nenegom aboka, okoka neknesil. **9** Nak dib senenggulunyaka' anasa, malya una' ak meknewoka seinilimak. **10** Ugunda eimik nak eibnenggununuluma' ak sam, nadya' neyung bek binimna' anasa, peroba' nenena' ak meknewoka seinilimak. **11** Sokok an dubnya bek seleb yana lelewoka igin yaka' alsamba seleb ulumla' anasa, yana lelesina' ak meknewoka seinilimak. **12** Nara yok-yok yuba nauba ugunuk lebnesisinya bok, wenyek dara, ugunuk hyak igin ubnesuso. **13** Bok, Imik Neyung jong ganya una' ugunuk lebnesil Geisinya benyek yalya dara, alja dib yuba nidya' ella danalum aboka neknesil. Alja ok yok seiniwoka ganya doboka lebnggunulabok, alja seleb kemlya' anyek, ugunuk neknesil. Nera yoka'-yoka' eimik unuwanalanya nyek neklemnesil. **14** Alja nak ab doboka, ugunuk neklemnesil adya, nadya si imik nenewanenel. **15** Yoka'-yoka' nidya' Imik Neyung aljinya ulumla' ara, narinya nek ulumla. Ban anasa, Geisinya bedya nak ab doboka, ugunuk neklemnesila' ak wenyasin," hyok. Yuba **16** "Ugunja nak eibnenggununulum salek era, mek anam ubnamlakanya, ono' saaboka eibnenulum salek era, mek anam ubnamla," hyok. **17** Yesus adya ban wenhyoka' seleb kemek dara, alak diriga ban nang edya sik moumen, "Ugunja nak henga eibnenggununulum

salek era, mek anam ubnamlakanya, ono' nak eibnenulum salek era mek anam ubnamla, helnya nera, hek damok nenesa lelemla do? Hnon, nadya neyung bek binimna anasa, alanya nera, hek damok emba lemla do? **18** Mek anam ubnamla alamlala' anasa, heka' ak lelemla do? Alja lelelanya nera nunda elgom ulumab bar," aboka leldalamek. **19** Yesus adya alja yuba doro diriga ban nang edya alak heibnoba' senemeka' eiyisuk dara, sikenek, "Eibnenggunulum salek era anam ubnamlakanya, eibnenulum salek era mek anam ulumla, ananya nenesa leboka, damok eboka heiboka gangabdangdo balalum de? **20** Nara ugunuk dib lebsin, Ugunda engewoka bonggeliklimnelum bok, soko ak dara, eiya hlaboka glolomnamla. Ugunuk suguna' ganya bolomnulum bok, ugunja suguna' ganya era eimik ei-ei ganya danamla. **21** Gela hnon me bomna gel gera, beibnamla salek me juka gweklamla dara igin ululabok, seleb beibna dara, wera me ara seleb sokok an beibna senewoka, oka gwekemna' ara hiliklamla. **22** Wen an lebnanya nera, ugunuk neik so danamla. Wen ganya engelelum bok, nara ugunuk ono' eibdeibya sum era, ei-ei ganya bolomnulum. Dara, ugunja ei-ei ganya ara yok nim edya ugunja ganya ek ab salya' lolowoka dobnenggunusak," hyok. **23** "Ban sum enyek, ugunja yoka'-yoka' nak molowanggunulum bok, ugunja nadya si sibuka Neyung bek nunda anyek elegeisilom aboka molowanalumnya nera nidya' eleganasila' ara dib lebsin. **24** Ugunda wenera, nadya si sibuka yoka'-yoka' Neyung bek elegeisilom aboka molonggululum. Wenyok molowolulum. Dara, ugunuk eleganesilikanya, hyak ei-ei ganya bolomnulum," hyok. **25** "Wen ugunuk wenyalasinya nera okoka poboka, gak ara an aboka lenggulusin bok, eimik yanamla sum era, nadya' neyung bek ban men lelesinya loboka, poboka laga lebnesin. **26** Ban lebna sum era, ugumbeyok nadya si sibuka molowanalum. Nababya nadya' neyung bek ugunsamba molowanamna' ara wenyanggulumna. **27** Ugunda nak alda Imik Neyung ak ab yeilimok senewoka, wana' nauba ulunuluma' anasa, Imik Neyung adya ugunuk hnon wana' ulusilekanya, alja yoka'-yoka' ugunuk eleganasil. **28** Nara Imik Neyung bek aba' ara sokok yeilimsa. Dara, ono' wen saaboka sokok loboka Neyung bek binimna," hyok. **29** Dara, alja yuba doro diriga ban nang edya Yesus ak, "Wenelesilimnya o, yoka'-yoka' nidya' ara bob

nenewoka lena' loboka, wera poboka lelam. **30** Anda yoka'-yoka' nidya' ella ululamakanya, yok nim edya anak yoka'-yoka' amba leboka salya' heibnenggununggeseng, ara wen ella ulenjab. Anasa, nunja dara, anda Imik Neyung ak ab yeililuma' ara, ban adya dib senelenjab," hyek. **31** Dara Yesus adya sikenek, "Wera, ugunda dib senelum de? **32** Ugun doluwoka bokgoknesak salek ara, eimik yanamla, hnonda al wen seleb yal. Ugunda ugunja e pik bokgokoka bindowanalumukanya, nara nabeyok lo bininulum bok, nabeyok unggulumnamna, nadya' neyung beb neika' alablaboka ulumnam. **33** Nadya ban orowek men ugunuk nidya' laga lelesina' ara, ugunda nablaboka seleb hnonok dangoka, perob ok ulululum aboka lelesin. Ugunda sokok an anam ulumun salek, yoka'-yoka' damok oka kwelemnesil bok, sokok an yoka'-yoka' damok ara, nadya seleb yu gom nenewasa' anasa, ugunja ganya siklewoka kaboka ulululum," hyok.

17:1 Wera Yesus ara ban nen seleb wenyabgogomok dara, imik sam keeb weininggoka, Imik Neyung ak lebokja, "Neyung o, unun salek era wera seleb laga dal. Anasa, Neyung o, anja me nedya anak si imik nenewogulula' aboka, albabya alja si nyenyek wen imik nenewalom. **2** Neyung o, anja me nek, neyung anja doboka alak elegolum nimi nidya' ak, dib embeng una' elegosulul aboka, migib una' era nimi nidya' ak unuwolula' aboka seleb elegendum. **3** Anda Imik Neyung ara hnonok ok dib nong ululamnya bek dib ella uboka, ono' anja sokok bokol yeililumnya Yesus Kristus bek hnon dib ella ulumak dara, embeng una' diba' ara alan. **4** Neyung o, nara anja elegendum wa nyenyek seleb webgogowana' adya, wera anja si nera sokok an imik nenewagesa. **5** Anasa, Neyung o, soko anam uyiwanggulum danyek, anablaboka ulunumukanya, si imik nenena' seleb dobsa sok, wenera anja saramek sam neik so imik nenewanenelem," hyok. **6** "Nara anja ululamnya nera, anja sokok an nimi bok doboka nak elegendum nang ek, seleb laga nekemsa. Nera anja mabo yoka' ulumek bok, anja doboka nak elegendum. Dara, sikda anja yuba pe doboka unulumekanya, **7** wenyek dara, seleb nak elegendumnya nidya' ara, anak ab lanalamla' ara, ella ulumak. **8** Anja yub enyek nak elegenduma' ara seleb sikenek leb elegesisa, dara sikda seleb domek. Na nong ak dara,

aldib Imik Neyung bek ab yeilimok senewoka, Imik Neyung adya bokol yeilimok nong ak sokok yok dib senemek. **9** Nara wen siksamba mololesin. Nara sokok an yoka' nim emba molonggulumna bok, alda Neyung o, anja nak elegenulum nang enyek, sikda anjinya nek ulumaka' anasa, mololesin. **10** Nidya' yoka'-yoka' narinya nera anjinya ulumlakanya, anjinya neneba narinya ulumla. Anasa leboka, sik nong adya nadya si imik dal. **11** Nara sokok an loboka anak yanamna' anasa, anyagan unggulumnamna bok, sikenek dara, sokok an or ulumnamak. Anasa, Neyung geisa ululamnya o, anab nab neika' denewoka ulunam sok, sikbabya hnonok nong ulunoka' aboka, anja nak elegenulum si migib edya, sikenek bleboka bo ulumnesilim. **12** Nara sikeneblaboka neika' ulumouba salek era, ban anja nak elegenulum si migib edya, nara sikenek bleboka pe bo ulusisa. Nadya pe beiyiboka bo ulusisa dara, Imik Neyung yuba momnya doboka' gigiwolula' aboka, weininggeldana' geknemoknya nok, hnonok seleb weiningdok," hyok. **13** "Wene salek anak yanamna bok, nara sokok an anam ulumna salek enyek, sikenek ei-ei ganya, nak ulunel sok, sikenek deknewosulula' aboka, mololesin. **14** Neyung o, anja yub enyek sikenek seleb leb elegesisaakanya, nara sokok anyebnya unggulumna sok, sikba sokok anyeb nang unggulumaka' anasa, wera sokok an yoka' nim edya sikenek lek senelesak. **15** Neyung o, sik nong anyek sokok anyeba' ara dobsiloma' aboka molonggulumna. Alda sikenek malya una'anya bedya obsilyek aboka, anja pe bleboka bo ulusiloma' aboka mololamna. **16** Naba sokok anyebnya unggulumna sok, sikbabya sokok anyeb nang unggulumak. **17** Neyung o, anja' dib yub edya, sikenek muna' nanga neneweisilom. Anja yub era, dib nong yub ara alan. **18** Neyung anja nak sokok an bokol yeilinulum sok, nadya ono' sikenek sokok an boksisa. **19** Neyung o, sik nong anyek, muna' mem nimi danoka' aboka, na damnya anaba muna'anya neneldalamna," hyok. **20** "Neyung o, nang en siksemba ok molonggulusin. Alda ono' eimik nim enebabya, yuba lelemnemaka' adya, nak dib senewanamak nim emba hnon mololamna. **21** Dara, nadya anak mololamna' ara, Neyung anda na lomok ulunelemekanya, nara an lomok ulunggen sok, sikbabya neika' hiboka hnonok ulunoka' aboka mololamna. Wera ono', soko nim adya, nak aldib Imik Neyung adya bokol

yeilimok senewanoka' aboka, sikda hnonok uboka nu lomok ulunoka' aboka mololamna. **22** Neyung o, numba hnonok hiboka ulunam sok, sikbabya hnonok hiboka ulunoka' aboka, wera anja si imik dangana' nak elegenuluma' ara, ono' nadya sikenek seleb elegesisa. **23** Dara, nara sik lomok uboka, ono' anda na lomok uboka, sikda hyak ganya hnonok ulunoka' aboka mololamna. Anadya wera, soko nim edya, Yesus ara aldib Imik Neyung adya sokok sam bokol yeilimok senewoka, hnonda Neyung anja nak wana' ulunelem sok, ono' sikenek wana' ulusil senewoka ella danoka' aboka mololamna," hyok. **24** "Neyung o, anja nak elegenulum nang edya, soko anam uyiwanggom danyek, men orowek anja nak wana' ulunuluma' anasa, wera si imik nenena' elegenuluma' anyek, sikda na ulumnya' ak ulumeijekanya, nak si imik nenena' anyek, sikba eibnoka' aboka mololamna. **25** Neyung perob ok ululamnya o, sokok an yoka' ara anak elgom ulunjak bok, nak dara, anak ella ulunggen. Dara, elegenulum nang edya dara, anda sokok an bokol yeilinuluma' ara, dib senelemak. **26** Neyung, anja ululamnya nera, sikenek seleb leb elegoka amesisa. Dara eimik eneba, nera soba' unubdibiganamna. Wera anja wana' elegonuluma' ara, sikja ganya ek sam soba' ulumlyekanya, nara sikja ganya lomok ulumnesin aboka unulumnamna," hyok.

18:1 Yesus adya ban nidya' seleb wenyaboka molobgogomok dara, alak diriga ban nang eb, neika' Kidron mek gemek sam gobuka bilimek. Dara, bilimeka' ak sam ara, ara gal damok nauba ulumok. Dara, al anyagan neika' wekel biniboka ulumek. **2** Yesus ak obnelum aboka yuba dil binimoknya Yudas bera oro wenyek, Yesus ab, alak diriga ban nang eb, anyagan soba' longolomeka' anasa, ban soko ella ulumok. **3** Dara, Yudas bera orowek ella ulumok bok adya, Yahudi yuba wa gaka' dub nang eb, Parisi nang eb dadya, orugusik Imik Neyung e diri ulumek nang eb, Romawi yin bona' nang eb dara, yin ab, wesa' ab, dolukna' gama' ab, boboka Yudas be we mengelemok pik yeilimek. **4** Dara, Yesus ara alak yoka'-yoka' nidya' unuwanameka' ara nidya' orowek ella ulumok bok adya, alak obnoba' aboka we yanggek nang sik berem yeiniboka, "Ugunda heknya ek el yabalelum do?" husuk. **5** "Nunda Yesus Nazaretnya benyek

elemab," hyek. Dara, Yesus adya dara, "Bera nara alan," hyok. Wera, Yudas bera Yesus ak yuba dil bilimoknya beneba neika' anyagan ulumek. **6** Yesus adya, "Nara bera alan," aldalamok enyek, obnoba' aboka we yeilimek nang era ban kemek dara, glaka sokok malyinggilimek. **7** Dara ono', Yesus adya saaboka hnon, "Ugunda heknya ek obnoba' aboka elelum do?" aboka heibsuk dara, "Nunda Nazaretnya Yesus benyek elemab," hyek dara, **8** "Nara alan seleb wenyasina' anasa, aldib nasamba elenumun bok dara, yok nang bululum hululum," hyok. **9** Yesus adya ban wenhyoknya nera, alja orowek lemok yub era, "Neyung o, anja nak doboka elegendulum nang era, hnon weiningdanggunumak," amoknya nenesa gigiwolula' aboka lebok. **10** Dara, Simon Petrus bedya parang gabo bomok ara doboka, Yahudi yuba wa gaka' dub nang edya oruknanya, si Malkhus bek alja o mekla' leboka emok. **11** Dara, Yesus adya Petrus bek, "Anja parang era men su' lomok onsok boblom. Anja dara, nara Neyung bedya oka gweknelam aboka elegen yok mek era denggunumso senenelem de?" hyok. **12** Dara, Romawi yin bona' nang eb sikja' dubnya beneba, Yahudi nim edya Imik Neyung yub ek pe keeboka bo ulumek nang eb, Yesus ak soruka salawoka henga goumek. **13** Henga goubeka' seleb dara, Kayafas bedya alja' yamal bek, ban salek era, Yahudi nim edya yuba wa gaka' dubnya Hanas ulumoka' ak bo byik. **14** Kayafas bedya orowek Yahudi nim ek, "Nunja soko malya dang-danga balamla' anasa, ben hnonok nidya' pelesulula' aboka somoganamso dara, perob," aboka wenelesuknya bera alan. **15** Simon Petrus beb, yoknya diriga balamoknya ben hnon, Yesus ak eimik dobgiga balarek. Ban salek Yesus ak diriga balameknya alja Yahudi yuba wa gaka' dubnya bedya ella ulumoka' anasa, wera alja eremek Yesus ab neika' wekerek. **16** Bok, Petrus bera beiyik e sindamak sekemok. Dara ono', yuba wa gaka' dubnya ella ulumoknya bera, saaboka yeilimookanya, beiyik goboka pikek diri seklemok ek wa gel geb yuba sabdeekanya, Petrus bek eboka e lomok bo wekemok. **17** Dara ono', pikek diri seklemok ek wa gel gedya Petrus bek, "Anda Yesus bedya alja yuba neklenggelnya ululam," aboka lel yabok dara, Petrus bedya, "Na goma', nara orok," hyok. **18** Ban sum era saragena' anasa, ek wa welemek nim eb, Imik Neyung ek pe keeboka bo diri ulumek nang ab, sikja uka

lolomeka' ak sekoka lekeldalamek dara, Petrus beneba neika' lekeldalamek. **19** Dara wene salek, Yahudi yuba wa gaka' dubnya bera Yesus ak alja diriga ban nang emba hnon, alja neklesuka' amba hnon, heilimok. **20** Dara, Yesus adya alak leboka' ara, "Nara sokok an hyak nidya' lelewoka laga lelemsa. Nara Yahudi nim edya yuba don ek hnon, Imik Neyung ek sam Yahudi nimi nauba longomna' ak hnon, nara gunuwoka lena' ara orok, nidya' laga poboka lelemsa. **21** Wei, anda hekasa nak heinelem do? Nak heinena' ara loboka, alda nadya sikenek yoka'-yoka' nidya' leboka lelemna' ara, hyak dib pe ella ulumaka' anasa, nadya yuba kemek nim ek heibnesilim," hyok. **22** Yesus adya Yahudi yuba wa gaka' dubnya bek wenyaboka laga lelemok enyek, yin bona'anya hnon, ok berem seklemoka' ara, yuba wa gaka' dubnya bek anaso wenyana' ara mem aboka, Yesus ak waboka omok. **23** Dara, Yesus adya yin bona'anya bek, "Nara malya lemnya dara, nera malya lelam aboka laga leblom. Dib lemnya bok dara, wera hekasa nak waboka olenelem do?" hyok. **24** Wera Yahudi yuba wa gaka' dubnya Hanas bedya, Yesus ara gasa heng gebman, Yahudi Imik Neyung yuba wa gaka' dubnya Kayafas bek bo bululum aboka orugosuk. **25** Simon Petrus bera or anam ukuk lekdangdo seklemok. Dara, anyagan seklemek nim edya, Petrus bek, "Anda Yesus adya yuba dololamnya bera an hnon," aboka lelemek. Bok, Petrus bedya dara, bobnenewoka, "Nara orok," aboka lebok. **26** Yuba wa gaka' dubnya bek arawoka welemoknya o mekla' garamoknya benyek, al nang yila' adya, Petrus bek, "Nara anak Getsemani wak ono' Yesus ab neika' ulmouluma' ara eibnenggubmagen do?" hyok. **27** Dara, Petrus bedya bobnenewoka, "Nara orok," aboka lel yabok dara, al wene sab-sab ayam wining yuba ngobumok. **28** Wera hyak luguna' nong anam gwelegel yabok dara, Yesus ak doboka yuba dubnya bek ara mok soko damnya Pilatus bedya senengom ek bo byik. Yahudi nim era, sikja perob sum dena' denemek bok anasa, nimiguma' blekibyek aboka, nimi henga gereksin dub ek ara Yesus al neika' weknenggumek. **29** Anasa, Pilatus bera beiyik goboka yibiniboka, "Ugunda hekasa benyek hek damok emba yana kiboka bo yeililum do?" aboka heibsuk. **30** Dara sikja, "Alda malya una' orok dara, alak unuwoka anda mok soko dubnya bek bo yanggunusibya," hyek.

31 Pilatus bedya Yahudi nim ek, "Wera doboka bobmunukanya, ugunja unuwanalum an yuba lelemla' sunuwoka yana lelel bululum," hyok. Bok, Yahudi nim edya, "Nuk dara, nim ona' anyek, mem alasak," hyek. **32** Ban unumoknya nera, Yesus adya alak somoganamoka' anasa, orowek al damnya unuwanenel aboka leldalamoka' anyek, gigiwolula' aboka lebek. **33** Dara, Pilatus bera saaboka senenggom ek wekoka, Yesus ak youboka, "Anda aldib Yahudi nimi dubnya ululam de?" aboka heibok. **34** Wera Yesus adya Pilatus bek, "Neyung o, ban leblamnya nera, anja ok ganya doboka seiniwoka leblam gom, yok nim edya anak wenyaboka Yesus ak heiblom amaka' anasa, heibnelem gom?" hyok. **35** Dara, Pilatus bedya Yesus ak, "Alda Yahudi nang ulumla senelenelem de? Anak doboka nak bo yeilinjak nang era, anja meneng sokok nang eb, Yahudi yuba wa gaka' dub nang eb dadya unjak. Dara, heka' men unuwoluma' anasa unjak goma?" aboka heibok. **36** Anasa, Yesus adya leboka' ara, "Nadya dub una' danenela' ara sokok anyebnya goma'. Nadya heik era dub una' danenel an ulumso dara, wera nadya mab edya Yahudi dub nang ek henga gregoka bo banggom aboka nak blebneseng. Bok ununena' orok ara, nadya dub una' danenel era sokok an unggulumla adya umla," hyok. **37** Dara, Pilatus bedya Yesus ak, "Wera anasa, anda aldib dubnya ululam de?" aboka heibok. Dara, Yesus adya Pilatus bek, "Nara dubnya henelem ara dib lelam. Nara sokok an yeilimsa dara, beiyinyeka' ara, nimi yok nim ek dib yub ak laga lebsununa' aboka yeilimsa. Anasa, dib yub ak wana' ulumak nim era, nadya yuba kelemak," hyok. **38** Dara, Pilatus bedya Yesus ak, "Hek yub ek dib nong ulumla do?" aboka heibok. Dara, Pilatus bera ek gouboka beiyik yibiniboka Yahudi nim ek, "Nara Yesus ak alja malya una' hnon eibnenggumna. **39** Bok, ugunja sob unululuma' ara, nunja Yahudi nim edya perob sum yenewan dara, nimi ben hnon henga gregamna' ara, nunsamba loblamlala' anasa, ugunja or ban Yahudi nimi dubnya benyek henga loblul senelelum de?" aboka heibsuk. **40** Dara, sikda yeiriwoka ebngalagoka, "Alak lobna' ara hyak mem loblom. Barabas benyek loboka elegeisilom," aboka lelemek. (Ban Barabas bera, hoka donanya ulumok.)

19:1 Wera Pilatus bera wekoka Yesus ak, an legeboka oblulum aboka

orugusuk. **2** Dara, yin bona' nang edya, si henga gwanewoka Yesus adya hukum sam goliyimek. Dara ono', mouk dok boka' boksom akleng hnon ongiyimek. **3** Wera sikda Yesus ak sam bini yeiniboka, "Anda hyak Yahudi nimi dubnya ululama' anasa, giblenjab," aboka nauba waboka olomek. **4** Dara ono', Pilatus bera ek aba' ara gouboka, Yahudi nim ek, "Kendululum, Yesus ak doboka ugunuk bo yeilisina' ara, damoka lelemna' anyek, alja anyek okoka malya ulumla' ara, eibnenggunna' anasa, ugumba eibluluma' aboka usin," hyok. **5** Wera, Yesus ara si heng adya huk ak goluwoka, mouk dok akleng ongiyimeka' ab, gobok dara, Pilatus bedya, "Wera anyek kendululum," hyok. **6** Wera, Yahudi yuba wa gaka' dub nang eb, yin bona' nang eb, Yesus ak eibik dara, "Oboka gal ak glabnok, oboka gal ak glabnok," wenyalamek bok, Pilatus bedya sikenek, "Nara alja malya una' uboka, damok anyek okoka eibsinya enyeka', nera or ugunja ganya doboka oboka dibnelum," aboka lebok. **7** Bok, Yahudi nim edya Pilatus bek, "Nunja Yahudi nang yuba momnya dobok sok, Yesus adya al damnya, Nara Imik Neyung bedya me, aldalamla' anasa, alda or somogolul," alamek. **8** Pilatus bedya ban wenyalameka' kebok dara, alda ono' lok so uboka, **9** saaboka senenggom ek wekok dara, "Anda damok ara hekmok abnya do?" aboka heibok bok, Yesus adya dara, alak meka' yuba sab eleganggubok. **10** Anasa wera, Pilatus bedya Yesus ak, "Anda nak yuba sal eleknena' orok ara lek senelam de? Nadya or oboka gal ak glablulum e, or henga loblulum e, henesininya bera nara an ulumna' ara, anda elgom ulunelem de?" hyok. **11** Dara, Yesus adya Pilatus bek, "Imik Neyung adya unun migiba', neyung anak elekgena' orok dara, wera, neyung anda yoka'-yoka' salya' ganya doboka unuwanggunusom. Anasa, neyung o, anak gom, alda nak oblulum aboka yuba diyinelnya benyek, alja malya una' era hyak senenggoma' ulumla," hyok. **12** Ban kemok dara, Pilatus bedya Yesus ak henga lob lobnuna' aboka dul yabok bok, Yahudi nim edya, "Ban benyek henga lobnelam dara, wera anda Kaisar bedya alja hemyab unggulumena' adya ubnelam. Nara dubnya aldalananya alda Kaisar bek isa'anya ulumla' adya lelelabok anasa," aboka ngeboka lelemek. **13** Pilatus bedya ban unurub yuba kebok dara, Yesus ak seleb doboka bo gomek dara, Pilatus bera henga geregoka yana lelelesika' ak, lagasa girik ekla

buna' ak, Ibrani yub adya dara, Gabata alameka' ak bucumok. **14** Ban salek era yubyek dukdukanek dang-dang balamok. Al ono' neik sum era, Israeli nim edya sikja perob sum meewanoba' aboka ulumek. **15** Dara, Pilatus bedya Yahudi nim ek, "Ugunja' dubnya bera alan," hyok. Bok Yahudi nim edya, "Bo goblulum, bo goblulum! Oboka gal ak glablulum," aboka lelemek. Dara, Pilatus bedya Yahudi nim ek, "Nadya ugunja dubnya benyek oboka gal ak glabnun de?" aboka heibsuk dara, Yahudi yuba wa gaka' dub nang edya, "Kaisar benyek ok nunja dubnya bera alan ulumla' anasa, or oblulum," aboka lelemek. **16** Dara, Pilatus bedya Yesus ak doboka, wera an oboka gal ak glablulum aboka elegesuk dara, yin bona' nang edya doboka bo byik. **17** Wera, Yesus ara alak oboka glabnemek gala, al damnya doboka bobok dara, nimi huk yanggol meinik, Ibrani yub adya dara, Golgota mein aboka silimek meinik sam bo byik. **18** Dara wera, Yesus ara mein enyek an gal ak glamek. Wera neik sum enyek, Yesus ab, hoka' dorek nang penya uboka, ben hnon sirik ek sam, ben hnon waneng ek sam, Yesus ara hnomung uboka, gal ak glabsik. **19** Wera Pilatus bedya, Yesus oboka glamek gal ak sam ara, Yesus ara Nazaret mok ebnya, Yahudi nimi dubnya an momnya dona' enyek doboka geregolulum aboka orugousuk. **20** Ban wenyaboka momnya domeka' ara, Yesus ara senenggom heik berem oboka gal ak glameka' adya, ban momnya dona' era Yahudi nimi nauba einilimek. Ban momnya domeka' ara, Ibrani yub adya hnon, Latin yub adya hnon, Yunani yub adya hnon, denewoka domek. **21** Dara, Yahudi yuba wa gaka' dub nang edya Pilatus bek, "Yahudi nimi dubnya aboka momnya donggom mem. Alda nara Yahudi nimi dubnya bera alan aldalalanya bera an aboka momnya doblom," hyek. **22** Bok, Pilatus bedya dara, "Al nadya seleb wenenya nok ulumnamlam," hyok. **23** Wera, yin bona' nang edya, Yesus ak seleb oboka gal ak glamek dara, sikda Yesus adya ongolomok boksom gwiriwoka domek. Dara, boksom garawoka dombadya nenewoka, ben hnonok-hnonok domek dara, ono' Yesus adya wameldan akleng eneba domek. Yan akleng ara garawoka lelewoka wibnenggumek, alda salya' doblinggoka denewoka wimek. **24** Dara, yin bona' nang edya sik moumen, "Boksom enera garal menekna' ara lobnemab mem. Alda heknedy nidy' dobnamlam

do aboka sununa' sunuwanamab," alamek. Ban wenyameka' ara, ununumna' lelemek nang edya Imik Neyung yuba momnya domeka' anyek gigiwolula' aboka ulumeka' ara, "Sik gangganek sam nadya akleng bokoldalamek. Dara, nadya dolungna' akleng dobnoba' aboka maka meiboka sunumek," amoka' anasa, yin bona' nang edya ban orowek lemok sok gigiwoka unumek. **25** Dara, Yesus oboka glamek gal damak ara, Yesus alja genong geb, alja weisab eb, Klopas ala' gel Maria geb, yok Maria Magdalena geb, diri seklemek. **26** Yesus adya alja genong geb, alja wana' ulumoka' diriga bannya beb, neika' sekereka' eibok dara, alja genong gek, "Genong o, nera anja me nera an," hyok. **27** Dara, Yesus adya alja wana' ulumoknya bek, "Nera anja genong gera alan," hyok. Dara ban sum enyek, Yesus eilin gera, nab neika' ulumnenam aboka Yesus adya wana' ulumoknya bedya domok. **28** Wera, Yesus adya yoka'-yoka' nidya' ara hyak seleb unumoka' ella ulumookanya, Imik Neyung yuba ununumna' yuba momnya doboka' anyek gigiwolula' aboka lebokja, "Nara mek ok ubnel," hyok. **29** Dara, ok berem ara yu anggur mek ek, mek hmei yanggol hnonok ulumok. Dara, hnyoma' anyek anggur mek lomok hwiboka, goroka' go gondowoka, Yesus adya sibama' ak sam dorongomek. **30** Wera, Yesus adya seleb debgogowoka, "Wera seleb nidya' gigiwal," hyok dara, nganga gukoka ganya dubhin dakoka somogok. **31** Yesus ara Yahudi nim edya Sabat mem sum oka dangamok dara, nim oboka gal ak glabalona' mem senelemeka' anasa, Yahudi nang edya, Yesus ab neika' oboka glasik nang eb dara, sikja yana bologoka, nimi be' dakoka sokok sam dibnemak aboka, Pilatus bek or unuwanamak gom aboka molol yeilimek. **32** Dara, yin bona nang era men biniboka, Yesus ab, neika' penya nang gal ak glasik nang edya yan moumena' yoka nidya' bologosik. **33** Bok, Yesus bek oka bilimek enyek, seleb somogomoka' eiyimek dara, yana bolokna' lomok. **34** Bok, yin bona'anya ben hnonja, Yesus adya yaija' ak sam gama' dolugomok dara, eneng ab, mek ab, berra belega yanggalamok. **35** Dara, ban nidya' unulumoka' anyek okoka ok ab eiyimoknya bedya, aldib unumok aboka laga neksuukanya, alja eiyimoknya bedya unumok hyoka' ara aldib lebok. Alja lebok yub era dib nong yub anyek ella uboka, ugumbabya dib seneleluluma' aboka nekesuk. **36** Ban unuwoka Yesus adya alja yana

bologanggumeka' ara, ununumna' lelemek nang orowek lero momnya domekja, "Alja yan yoka hnonok sabin anaba bologanggunumak," aboka momnya domeka' anyek, gigiwolula' aboka umek. **37** Dara ono' ununumna' yuba momnya hnon doboka' ara, "Nim adya sikja alja yaija' ak gama' dolugumeknya bek kemelemnemak," aboka momnya domok. **38** Ban eini nidya' unumoka' seleb dara, nimi Yusuf Arematea mok ebnya bedya, Pilatus bek, "Yesus ara be' dakoka dibnamna goma?" aboka molol bilimok. (Yusuf bera Imik Neyung yuba doboka Yesus adya diriga ban nang ulumok bok, Yahudi nang anyek lok anasa, laga lenggulumok.) Dara, Pilatus bedya, "Or unuwanalam," hyok dara, bindiwoka Yesus anyek be' gala dakoka domok. **39** Wera ono', youma' Nikodemus Yesus ak inimnek yeilimoknya benebabya, Yusuf beb Yesus doboka neika' dibnenam bar aboka yeilimok. Dara, Nikodemus bera benelya song gal ab, ngikildan gal yareng ab, nidya' hiboka igin ara tiga puluh kilo anaso' ak bo yeilimok. **40** Dara, Yusuf beb, Nikodemus beb, Yesus adya be' dakoka beibdek dara, somogan nim dibnamna danyek, song mek eb, kelemek boksom eb waaboka, Yahudi nang edya nimi somogan nim unulumek sok sunuwoka ubdek. **41** Dara, Yesus oboka gal ak glabnemeka' berem, nimi dilina' perob oulyang hnon ulumok. Dara, al onok ara, nimi hnon meka' dibnenggumeka' anyek, or anam loklomek oulyanga hnon ulumok. **42** Dara, ban oulyang anyek ok uboka, Yahudi nim edya perob sum era oka dok bok anasa, Yesus ara anyagan loklomek sokok beiyimek.

20:1 Dara, minggu en men sum hyak gwelekna' yangman anyek, Maria Magdalena gera Yesus diyimeka' ak bilimok. Wera Yesus diyimek girik era, seleb dangawoka demegemoka' ak eiyimok. **2** Dara, Maria gera berra aboka Simon Petrus beb, Yesus adya wana' nauba ulumoknya alja yuba doru diriga bannya beb, ulureka' ak biniboka, "Wenelesilnya bera nim adya hoka' be' gekman dakoka bo byaakanya, hanyagar gelelenga doknowoka beiyimaka' ara nunda elgom ulumab," wenyal byuk. **3** Dara, Petrus beb, ban yok diriga bannya beb, Yesus diyimek oulyang ek kemel bilirek. **4** Wera, sik penya nang era berra aboka yeiriwoka kemel balarek bok, yoknya benyek men Yesus diyimeka' ak ok berem bilimok, bok Petrus

bera or nemen so balamok. **5** Dara, men byuknya bedya geniwoka Yesus diyimek girik lomok kemelemok enyek, waaboka diyimek boksom ok anyagan ulumoka' ak eibok. Bok alda girik lomok ara weknenggumok. **6** Dara ono', Simon Petrus bera eimik yeiniboka, alda Yesus diyimek girik lomok wekok. Dara, alda Yesus waaboka diyimek boksom hnon eibuukanya, **7** Yesus adya hukum sam waaboka diyimek boksom ara pe winiwoka albeyok oka mamoka' ak hnon eibuk. **8** Dara ono', men bilimoknya beneba Petrus beb neika' wekoka, ban nidya' unumoka' anyek, alja heng adya kaboka okoka eiyimok dara, dib senemok. **9** (Sikda orowek Imik Neyung yuba momnya doboka' ak sam, Yesus ara somogalya dara, winilinya sum embenga' suboka buknamla aboka, momnya doboka' ara, anam elgom ulumek). **10** Dara, yuba doru diriga ban nang ek sam on pik bilirek. **11** Bok, Maria gera Yesus diyimek girik damak engero seklemok. Engelemok jok, ono' geniwoka girik damok dan kemok dara, **12** wera alda Imik Neyung lero nanga penya geisa boksom ongo-ongo bilirek nang ek eiyisuk. Penya lero nang era Yesus adya be' girik ek sam, ben hnonda huk sam ben hnonda yan ak sam, bulureka' ak, Maria gedya eiyisuk. **13** Dara, nang danadya Maria gek, "Genong o, anda hekasa engelelam do?" aboka heibdek dara, Maria gedya sikenek, "Nadya wenelesilnya benyek, nim adya hoka' doboka, hanyagar beil bilimak do aboka engelamna," hyok. **14** Seleb wenyabdangoka, ono' dangawoka weilik sam kemelemok enyek, Yesus ara lagono sekemoka' ak eibuk bok, Maria gedya dara, wera Yesus ara alan sekemla senewoka ella ubnenggumok. **15** Dara, Yesus adya Maria gek, "Genong o, anda hekasa engelelam do? Anda heknyek elelam do?" aboka heibuk. Wera, Yesus nong bok, Maria gedya dara, Yesus diyimek soko weny benya' aboka, "Neyung o, anja Yesus be' dakoka doknemen dara, na damnya dobnamna' anasa, anyagan doknomna aboka neknelom," hyok. **16** Dara, Yesus adya Maria gek, "Maria o," hyok. Wera danyek, Maria gera dangawoka, Ibrani yub adya, "Rabboni o," hyok. Rabboni nunja yub era, neklesilimnya alamla. **17** Danyek Yesus adya, Maria gek, "Nadya' neyung bek anam binggumna' anasa, anda nak soruk salanenggom. Bok, anda berra aboka nadya hemyab ek bimenekanya, Yesus ara seleb nub alab, nunja neyung

Imik Neyung bek, binimla aboka, wenyal bilom," hyok. **18** Wera, Maria Magdalena gera, Yesus yuba doro diriga ban nang ek biniboka, "Nara Wenelesilnya bek seleb eibna," wenyaboka, ono' alja ban hnon ban hnon aboka wenyhenel wenyaro nekdo bilimok. **19** Dara ono', al on minggu en men sum enyek seleb inimok dara, Yesus alja yuba doro diriga ban nang era, Yahudi nang enyek lok anasa, obsijek aboka pika gasa seregoka, hnonoka' ak longomek dara, Yesus ara albeyok sik gangganek sam gelelenga sekel yeilimok dara, sikenek, "Maly, lok ganya bonggom," aboka lebok. **20** Yesus adya ban seleb wenyaboka lebok dara, alja soruka paku bokomeka' ab, yaija' ak gama' dolugumeka' ab, wera an unuwanyeka' anyek, kendululum aboka sikenek amasuk. Dara, alja diriga ban nang era Wenelesilnya eiyimek dara, hyak nauba eiya dasuk. **21** Dara ono', Yesus adya saaboka lebsukja, "Maly, lok ganya bonggom. Neyung bedya nak sokok sam bokol yeilinyok sok, nadya ugunuk Imik Neyung yuba lero balalulum aboka boksin," hyok. **22** Dara, ban wenyabgogomoka' seleb dara, sikenek hiba' gob goluwoka, "Wera Imik Neyung Geisinya doblulum," asuk. **23** "Ugunda yok nang malya una' sikenek ab memewanggunulum dara, Imik Neyung anababya ugunja malya una' ugumbabya meewanggunusil. Bok, ugumbabya nimi malya una' sikenek ab memelemnalum dara, Imik Neyung anaba neikik, ugunja malya una' ugunuk ab soba' memelemnesil," hyok. **24** Bok, Yesus yeilimok dara, yuba doro diriga bannya ben hnon nimi si Thomas yok si nera Didimus alameknya bera, yok yuba dolomek nang eb, neikik unggulumek. **25** Dara ono', yok diriga ban nang, "Nunja Wenelesilnya Yesus bek aldib eiyimab," aboka lebek dara, Thomas bedya sikenek lebsuka' ara, "Nara Yesus adya soruk ak paku bokomeka' diliga' ab heng yoka' bekoka eibnenggumnya dara, ono' nadya soruk enyek, alja gama' yaija' dolugeka' diliga' ak soruka dolongna' orok dara, nara aldib senewanggunumna," hyok. **26** Dara, ono' nenyek minggu sum enyek, Yesus alja yuba doro diriga ban nang eb, neika' Thomas beblaboka neika' ak ulumek. Dara, e pika nidya' gasa seregoka longomek bok, Yesus ara gabdeboka sik hnoumunga sekoka, "Maly, lok ganya bonggom," hyok. **27** Dara, Yesus adya, Thomas bek, "Anja soruk era nak an dibmenekanya, nadya soruk ak an kendelom. Anda soruk

okoka, nadya yaija' lomok sam soruka doronggoka, wera nak ganya penya-penya loboka, alda wera nak dib senewanenelem," hyok. **28** Dara, Thomas bedya Yesus ak lebokja, "Nadya' neyung Wenelenelemnya, nadya Imik Neyung alan ululam," hyok. **29** Dara ono', Yesus adya Thomas bek lebokja, Anak dara, nak ok okoka eibnelema' anasa dib senewanelem bok, nimi yok nimi nak heng eilinenana' orokjok, nak dib senewanyak nim era, hyak pe ulumak," hyok. **30** Yesus adya hyak yoka'-yoka' damoka nauba, alja yuba doro diriga ban nang edya hogung ak yoka'-yoka' lok so' bekna' nauba unulumok bok, buku enyek an unulumoka' nidya' ele' gigiro momnya dobnenggurub. **31** Bok, ban nidya' anyagan momnya dorobnya nera, ugunja Yesus ara aldib Kristus nimi blebsina' dubnya uboka, Imik Neyung me diba' senewoka seiniwoluluma' aboka, dara alak dib senelemuna' adya, alja si nenesa leboka, ugunda embenga' una' diba' dobnelum aboka, ban yub era momnya dorob.

21:1 Wera ono', Yesus ara alak diriga ban nang ek sam, Tiberias mek gwan gemek sam sikenek saaboka aabdok. Alja unuwok yub era ban: **2** Simon Petrus beb, Thomas benesa yok si nera Didimus aboka silimeknya beb, Galilea sokok Kana heikek abnya Natanael beb, Zebedeus bedya mabo penya, ono' yok diriga ban nang yok penya nang eb, mamagoka ulumek. **3** Simon Petrus bedya yok nang ek, "Nara ikan el binimna," hyok dara, ono' yok nang edya, "Wera nunda neika' unuwanamab," hyek. Dara wera, sikda bindiwoka mek ekla buna' ak bukumek dara, inimnek pik moruwoka elemeka' anaba, hadya' hyak meka' sabin anaba yoka'-yoka' hnon dorowanggumek. **4** Dara, gwelek sirigoka henga dorogol yabok dara, Yesus ara mek gwan gem berem sekemok bok, alak diriga ban nang edya mek dubuk sam ab dara, nera Yesus ak sekemla senewoka ella ubnenggumek. **5** Dara, Yesus adya sikenek, "Najabo yab o, hadya' hnon dolum gom?" aboka heibsuk dara, sikja, "Hnon doldona' orok," hyek. **6** Wera, Yesus adya, "Ugunda hadya' dobnelum aboka, ugunja hadya' ouma' akleng anyek, mek ekla buna' sirik ek sam bobogolulum," hyok. Dara, unuwanalum amok sok unumek dara, hadya' ouma' akleng ara hadya' nauba adya deknewoka lang-lang alamok adya jabnamenggoma

dangamok. **7** Wera danyek, Yesus adya hyak wana' nauba ulumoka' alja yuba doro diriga bannya bedya Petrus bek, "Ban ara Wenelesilnya benya'," hyok. Petrus bedya, "Ban ara Wenelesilnya bera an," yuba kemok dara, men gwirimok akleng era ono' ongobgogobok dara, mekek yoruwoka mek gemek bilimok. **8** Dara, yok diriga ban nang era, or ok gem berem wera ok berem ulumeka' anasa, hadya' deknemok aklenga gliboka mek ekla buna' pik eimik gokgiga bilimek. **9** Wera, sikda mek gemek sam seleb yeilimek dara, Yesus ara orowek uka sekoka hadya' hnon uk ak dab loboka, roti gwaneng uk dubuk weremoka' ak eiyimek. **10** Dara Yesus adya, "Wera ugunja wen doblum hadya' era hnon anyagan wen bo yoululum," hyok. **11** Wera, Simon Petrus bera mek ekla buna' eilib welewoka, ikan akleng gliboka gemek bo beil yok. Nidya' hadya' ok deknero lomoka' adya, hadya' nidya' hiboka dara, denga hhab badya anaso ulumok bok, hadya' ouma' akleng era hnon meka' denewanggumok. **12** Dara Yesus adya, "Wera yeiniboka del yabalelulum," hyok. Wera sikda nidya' ara al banara Yesus ulumla senemekjok, sikja hnon anda heknya do aboka asa' ganya boboka, ben hnonok anaba heibnenggumek. **13** Dara, Yesus ara yeindeboka roti gwanenga doboka soboka sikenek elegesuukanya, hadya' anaba neik so unusuk. **14** Wera Yesus seleb somogomokjok embenga' suboka bukok dara, nen unumoknya nera li winilinya, Yesus adya alak diriga ban nang ek al nonga laga amasuk. **15** Wera, sikda nidya' seleb debgogomek dara, Yesus adya Simon Petrus bek, "Wei, anda Yohanes mamnya Simon o, yok danara mek so bok, anak dara, nak hyak nauba wana' ulunelem do?" aboka heibuk. Dara, Petrus bedya Yesus ak, "Aldib e, Wenelesilimnya o, nara anak wana' ulunggena' ara anda ella ulunelem e," hyok dara, Yesus adya Petrus bek, "Wera anasa, nadya domba memab anyek, pe gregoka bo ulunelom," hyok. **16** Dara ono', hnon sounuwoka penenya sum Yesus adya Petrus bek, "Wei, anda Yohanes mamnya Simon o, anda nak wana' nauba ulunelem gom?" aboka heibuk dara, Petrus bedya Yesus ak, "Aldib e, Wenelesilimnya o, nara anak wana' ulunggena' ara anda ella ulunelem e," wenhyok dara, Yesus adya Petrus bek, "Wera anasa, nadya domba pama danyek pe gregoka bo ulumnenelem e," hyok. **17** Dara, Yesus adya Petrus bek, alja onsok

saaboka neiknya nenyek li winilinya sum, "Anda Simon Yohanes mamnya, nak nauba wana' ulunelem de?" aboka heibuk dara, wera Petrus bedya ganya angoo senewoka, Yesus ak, "Wenelesilimnya o, anda yoka'-yoka' nidya' ella ululama' anasa, wera anasa, nadya anak nauba wana' ulunggena' ara anda ella ululam," hyok dara, Yesus adya ono' Petrus bek, "Wera anasa, nadya domba pam enyek pe geregoka bo ulunelom," hyok. **18** Dara, ban nidya' Yesus ab, Petrus beb wenyab danggogoreka' seleb dara, ono' Yesus adya Petrus bek, "Nara anak dib lebgen. Anda wen anam goubenya ululam danara, goukwa norona' ara an damnya norobdangoka, anja nara anyagan bisinya senemna' ak sam balalam bok, eimik anda nauba damen dara, anda soruk ok okmenekanya, yok nim edya anak noroyiboka, anya ban mok enyek an bana' lek senemen ak sam bo bininjak." **19** Yesus adya ban nidya' Petrus bek wenhyoka' damok ara, Imik Neyung si imik nenen danasa, Petrus benyek heka' huboka somoganamoka' damok anasa lemok. Ban nidya' wenyabgogomoka' seleb dara, Yesus adya Petrus bek, "Anda nak diriga yalanelom," hyok. **20** Wera, Petrus bera kemel samalemok dara, Yesus adya wana' nauba ulumoka' yuba doru diriga bannya bera, eimik dobol balasuka' eiyimok. Yesus obnemeka' anasa, neika' sidya' deldaklemek sum enyek, Yesus berem bukoka delemoknya bedya, Yesus ak, "Wenelesilimnya o, anak heknedy a oblulum aboka yuba dil bilinggel do?" aboka heimoknya benyek okoka eiyimok. **21** Petrus bedya, bera eimik balamoka' eibuk dara, Yesus ak, "Wenelesilimnya o, ban benyek anara, heka' danamla do?" hyok. **22** Dara, Yesus adya Petrus bek, "Nadya alda or embenga' ululul senemnya dara, alda or moruwoka ulumlya' ara na eimik yanamna. Anasa nera, anjinya goma', loblom. Bok, anda nak diriga yalanelom," hyok. **23** Dara wera, ban diriga bannya bera, alda somoganggunumla an yub era, Yesus yuba don nang gangganek nidya' oboka lelemok. Yesus adya, alda eimik somoganggunumla ana' ara orok bok, alda Yesus adya dara, nadya embenga' ululul senesinya dara, alda or embenga' ulumnamsu, nera ugunja goma', amoknya nenesa lelemek. **24** Dara ban benyek ara, Yesus adya unulumoka' nidya' ak laga lelemookanya, ban yuba domoka' momnya doboknya bera alan. Alja nidya' momnya doboka leboka' ara, dib nonga leboka' ara nunda nidya' ella ulumab. **25**

Dara, Yesus adya unulumoka' ara yoka'-yoka' hyak nauba hnon unulumok.
Ban nidya' pe yana lelewoka ella' gigiro momnya doseng dara, nadya dara,
wera soko me nidya' lendeboke oulyang okna danamso' anasa, hnon
darasam buluk loboka momnya dorob.